

二支

九十二

永樂大典

永樂大典

卷九百一  
之九百二

永樂大典

永樂大典

永樂大典



# 永樂大典卷之九百一

二支

## 詩 元詩三

元程雪樓集李氏八十詩。憶昔甲公八十餘。故人曾爲辦安車。太平天子思文治。會向山中訪禮書。又題許仲仁詩卷。殘雪詞林退食時。小牕開卷鬢如絲。音傳正始誰同調。氣逼元和稍自持。文字不隨前輩盡。風流却許後人知。霜清日冷梅花瘦。獨對爐熏看欲癡。胡祇適紫山集無題

此心本虛明。百欲日昏蔽。譬如鏡積塵。不復加磨礪。逾遠逾忘反。與馬牛無異。既無賢父兄。學校久亦廢。耳目所見聞。俛鬼雜魑魅。習熟爲當然。寧復知慙愧。天道如循環。亂極應還治。英哉賈長沙。太息更流涕。可憐漢孝文。苟且承秦弊。茲時去古近。三代良可繼。失時而不爲。令人增歎喟。

氣質苟不高。百爲皆瑣屑。趨向日污下。遂逐聲利輟。年來省前非。改圖當勇決。堯舜至周孔。八聖吾慕悅。立德與立言。汲汲追前烈。求心即師友。自語自磋切。必待文王興。庸懦非英傑。松柏一出土。便與蓬蒿別。已見千尺姿。從渠歲寒雪。五十無所聞。固爲聖人棄。矧余已六旬。耳目漸昏曠。雖

永樂大典

永樂大典

逢庸鄙人謂我不足畏。壯年不可追。知悔當自勵。倒行而逆施。斯言何自棄。莊敬日可強。憤排通必遠。壽考吾不知。力進王良轡。夜行固云差。失道苦不遠。天明得正途。歡喜忘呀喘。我車頗堅完。我馬亦強健。白日雖過年。僕御皆再飯。周道直如矢。良辰未晡晚。聖域望九關。觀光得吾願。拘以形氣微。與天不相似。我心即天心。人天本無二。凡天之所以。我無一不備。克去形氣私。量包天地外。知化且窮神。述事而繼志。彌綸復裁成。了却大人事。衛青霍去病。起身自淫奴。所知勤皂隸。何者為孫吳。一朝當帝意。總節持兵符。出塞三十萬。入塞三萬餘。無人問二子。方略果何如。李廣飛將軍。受制於庸愚。敗死不封侯。數竒良悲夫。賈誼真英才。王道乃素學。孝文好無事。欲為還齷齪。公卿盡庸愚。厭已忌超卓。鵬鳥亦知天。飛飛入帷幙。不遇庸何傷。王道惜真漢。朝誦論孟辭。暮誦六經言。臨事毛髮比。一一皆差愆。此病果何在。不識我之天。我天殊不遠。性理即真源。真源一淵靜。動止合自然。泓澄百鍊鏡。流行派萬川。去月呼使君。今月呼參卿。而我竟為誰。側耳隨呼應。貴賤不自持。甘為世枯榮。譬如畫家筆。汙潔幾紅青。又如築夫幹。從人恣沈升。人生豈物耳。終老無定稱。夢寐驚寵辱。俯仰徇虛名。稟受作猛虎。一飽肉百斤。脫殼為秋蟬。餐飫風露晨。二蟲

永大



各有適。不知天地仁。人出萬物表。反自喪其真。既羨晉楚富。復傷顏氏貧。  
物生本不齊。安能同一均。奪彼以與此。怨尤徒非辛。顏淵問爲邦。樊須  
請學稼。同在聖門中。人品自高下。執一不知人。玉石俱同價。所以三閭翁。  
寧死不迴駕。胸中富義理。肆口能成文。區區旣問學。漫費緹緝勤。余生  
過中年。讀書頗有聞。物外不眩惑。少覺德性尊。聖域固云遠。循序亦能臻。  
瞑坐恨眼力。絕慮靜靈源。四十無所聞。安用瞻空言。母貪文字名。正坐  
蠹塵昏。咕咕誰汝聞。何異蚊雷喧。書生太癡絕。甘愛古語謾。坐看青雲士。  
龍馬來高轅。秋風墮木葉。蕭蕭走前軒。歲序與流水。冉冉相馳奔。好事  
得入手。急行能幾多。况復墮閑散。萬慮成蹉跎。惟餘誰作祟。搜扶傷天和。  
擾擾靈府間。起落如翻波。以茲銷年光。寃哉雙鬢皤。佐命惟勲舊。忠清  
三十年。赤心思報國。白髮要寧邊。夢破烏江月。神迷瘴海煙。忠宣拜嘉謚。  
未讓伏波賢。得死公無恨。思賢民自哀。方期當柱石。奚想便泉臺。廟貌  
祭如在。銘旌哭遠來。從今調鼎手。誰繼作鹽梅。七十衰翁與世疎。閑心永  
日共安舒。却緣當路憐愚直。時有人求紹介書。昏衰敢不慎許可。踈散  
竟能誰重輕。周道從來直於矢。並驅九軌儘寬平。高下洪纖無棄物。兼  
收並蓄廟堂權。固知滄海能容物。昏耄胡爲敢薦賢。書判身言已失人。

永樂大典

大



况將末法委沙塵。只憑冒次懸明鏡。黑白妍蚩總識真。神游八表鳳麟姿。造物無私却有私。鍾秀千年猶旦暮。何妨異代不同時。龍眠高趣惜

英才。誰問先賢與後來。霽月光風同一處。寫留人世洗塵埃。每愛高風蓮社圖。當時果有此容無。龍眠何處曾相遇。夢破三生向日吾。黃塵擾

擾萬虵蟬。仙人幾何同一漚。环重畫圖聯杖履。免勞神夢覓從游。雪壓

茅廬風滿林。野鷗寒鴈共昏陰。畫師暗隱無窮意。何處漁舟不可尋。萬

里清江一葉舟。月華西去水東流。傷心不見魯連子。何物人間萬戶侯。

應命趙畫索詩。丹青雖細藝能者皆高人。請看宣和譜。品分能妙神。風

雲湖海士。廟堂名節臣。魯次同造化。慘淡入經營。天地生萬物。我筆能奪

真。凜凜冰雪冬。熙熙花柳春。嘗觀蓮社圖。真宰差凡塵。世無王黃華。清論

不復聞。銅臺趙濟之。索言期世琢。筆跡我未見。詩卷何輪囷。許與多名士。

定如詩什新。古人家數中。當與誰等倫。鄙俚敢靳惜。酬報當殷勤。寄我數

十字幅。黃華我比鄰。王仲畧之子持卷求詩。仲希能尚友。遺山善忘年。

草聖新樂章。子孫宜世傳。邇來風俗薄。情以勢利遷。漠然見父執。手澤隨

棄捐。仲略吾世契。有子乃爾賢。迄命四十年。墨光猶炯然。秋澗題訓辭。廣

文贈佳篇。不鄙賤衰朽。千里來乞言。乃伯辭理盡。援筆還自憐。願言通家

# 永樂

好世世金石堅。偶成人材應時須。用舍奚在己。所以掩鼻笑。正恐不免耳。生與噲等伍。背汗增愧恥。螻蟻既墮地。未見寒餓死。可憐奔競徒。賤辱無不至。蹴爾而與之。乞人且不視。隗磊胷中十萬兵。故從阜樞默無聲。驚回九合諸侯夢。一曲高歌獲上卿。舉選科亡棄實才。紛紛詭售起蒿萊。誰知牛口寒微隸。一論齊疆萬里開。小白雉開五霸原。一時賢相炫乘軒。只知國富兵強術。不向尊周掛一言。退食委蛇百慮新。漫誇事業在經綸。乘時偶作登龍客。無術慙爲入幕賓。莫喜肥甘潤枯質。曾無恩澤到斯民。馬前走卒休嗔咤。八議潛歸市井人。每恨平居不我知。問渠今日竟何施。因人碌碌漫成事。舉世庸庸與易誰。委順漸如隨侶鴈。剛稜自笑脫囊錐。一杯飽食黃梁飯。睡足槐庭畏日遲。命安齋主寄詩來。把翫歌吟卷復開。似厭羲皇閑日月。要同俗吏走塵埃。只知芻豆填牲腹。不識青黃是木灾。試向碧天清夜望。惡雲妖霧鎖三台。牟巘陵陽集戚子雲袖詩見過。且薦叙先祭酒。與先人同朝之雅意甚古。用韻爲謝。白髮祭酒公。儀形古君子。多士所共敬。豈獨桑與梓。吾翁幸同朝。輦路時並轡。治風日以邈。追慨徒倚徙。子雲薦世誼。揭來自攜李。念我一破廬。落落荒城址。遺以五朶雲。置之五雲裏。我是老祠官。未忘鏡湖水。握手更細論。書味

永  
大

曲



淵以旨嘉聞有青衿十載詩千紙失題 篇章餘事等嬉游尚想揮毫  
剪燭秋從古殺青徒自苦只今醉墨可能求忽傳鷺立沙頭句又見鴻歸  
天外州襍研去來須猛省不由自己更誰由 王梅泉生日惠詩次韻答  
之 堪笑衰翁作計狂又隨笈箬到魚梁未秋早覺凋蒲柳已老安能種

豫章誰似讀騷仍飲酒有時贊易自焚香梅邊有約君應記但愧年來久  
覆觴 趙石心詩 試問吳兒歌小海何如廣平賦梅花一片心石無不

死平生不落徐庾家趙子陳陳有冑府雲根半夜生槎牙有時盤空吐硬  
語更覺世上浮且夸誰能為藝青藜杖苔莓荒盡天祿與辟邪 予與會

孟同游古心先生之門死生契闊今見其十年前與仲實詩帥初既追和  
予亦繼焉 擾擾人間萬事塵舊交無柰白頭新此翁固是同門友今日

真成曠代人千里賞音知絕識九秋落木見橫陳也休頻把遺篇看說到  
銅人更愴神劉靜修集佳木交清陰欣然動人意况聞翁之風能不有生

永樂大典

氣此翁少有兄干戈鄉縣異哀鳴念羈孤相思勞夢寐自誓畢此生復爾  
歡聚遂千里三往還竟扶籃輿至夜雨一方床春風滿天地家無十歲僮

百役一身寄效兒浣廁踰代婦理中饋生志悻獨憂死免道路棄關河隔  
故丘走送徇歸志大義今已全初心始無愧翁本不識書所知惟藝事作



詩美翁賢亦以警士類。擬古。孤蟾皓素色。寂寂虛堂深。傷彼蘭蕙花。鬱鬱芳幽林。美人天一方。佳禽響遠音。我有一卷經。洞徹天地心。我有一寸鐵。蕩滌妖氛沉。心定有天游。淵乎祕中襟。所得不可說。此理神其歆。浮雲翳陽景。靈颺扇我衣。男兒志萬里。誰復傷別離。我生十五年。世事猶未知。慨然慕意氣。遠與千古期。高風不易攀。俗紛亦已羈。所智必我拒。所期必我違。哀歌仰天問。生我亦何爲。撫劍一太息。晝夜中情馳。人生天地間。太倉梯粟微。苟無金石姿。耐此日月飛。當勉玄髮歡。勿取塵世嘆。一笑群憂失。三盃萬事非。豈不志功名。功名來未遲。萬物各有時。時兮不再違。

憶昨初讀書。人曰飢寒基。今日追斯言。誠哉不我欺。屠龍無所用。不如學履稀。鏤卸非所授。不如囊中錐。多少白面郎。屈節慕身肥。奴顏與婢膝。附勢同奔馳。吮癰與舐痔。百媚無不爲。丈夫寧餓死。豈與需臍期。鴻鵠凌雲志。燕雀焉能知。二禽登寥廓。斥鷃笑藩籬。世能盡佞鬼。吾將誰與歸。

永大

凡物能振厲。即見生意融。慢氣或少施。衰颺不自充。志至有定位。敬勝多奇功。強哉復強哉。德業將日隆。雜著。人生豈不勞。終古謂之然。孰是

都不營。早起暮歸眠。過足非所欽。躬耕非所難。但使願無違。甘以辭華軒。正爾不可得。在已何怨天。自古有黔婁。被服常不完。榮叟老帶索。飢寒况

當年何以稱我情。賴古多此賢。善惡苟不應。鬼神昧茫然。是非苟相形。行止千萬端。世路廓悠悠。聊且憑化遷。居常待其盡。任真無所先。詩書塞坐外。弱子戲我前。親戚共一處。餘糧宿中田。促席延故老。斗酒散襟顏。聊以永今朝。百世誰當傳。絕句。溪童出門望。鷗鷺滿空下。江水淡無情。盡是忘機者。今朝客爲求。文至昨日隣。嫌借米移。木枕質錢多。舊帖看囊不必要。新詩出門已坐十年遲。擇地寧容一物棲。弊帚萬金空自許。青雲平地欲誰梯。長庚只合陪殘月。衆楚安能立一齊。醉裏商歌動寥廓。飛鴻淡淡夕陽低。雜詩。聞昔飛狐口。奇兵入擣虛。人才九州外。天道百羊餘。草木皆成騎。衣冠盡化魚。遺民心膽破。韓說戰爭初。關嶺通山後。風謚採路傍。地寒人好壽。草淺畜宜羊。用水如奴婢。從川貯米糧。西風如有約。乘興即吾鄉。堯山唐故國。淳朴帶遺蹤。種果收奴力。開田享素封。來收多上藥。景仰近神峯。夢寢驅黃犢。巖居一老農。冀北高寒境。英靈海嶽全。期文若程邵。家世亦幽燕。祀典今誰舉。遺經會有傳。吾鄉此盛事。瞻仰在佗年。何事招提好。山深馬可驅。松巢低映帽。竹潘細通厨。霜栗千封戶。雲屏四畫圖。冠巾如我用。白鹿起規模。巖居訪高道。少曰在風塵。回首話前事。低眉厭此身。江山資寇盜。田畝化荆榛。領將天倫重。無君

# 永大



愁殺人。水繞千山合。雲藏數畝荒。初尋香有陣。漸入翠成行。脉穿依危石。牛蹊帶小塘。團茅菴如畫。可惜是逃亡。一語喚醒瑞巖老。千言不昧

草庵歌。閑人爲向忙人說。佛法元來本不多。老免雖難自有春。壺冰徹底照來真。驢鳴畢竟渠皆聽。解識天機得幾人。水華庭草思悠然。風月

濂溪有正傳。二十四年程主簿。已知隨柳過前川。天教觀物作閑人。不是偷閑故隱淪。要識邵家風月興。一般花鳥華山春。寒氣嘗侵一半春。

詩家道體說來真。不教曉入雉雞口。誰喚南窓打睡人。湯鼎石壇老眼親。陰陽誰見屈中伸。年來併識顏家樂。十月天教薺愛春。漫記天幕

高懸兩部蛙。水光山色照黃家。忘情未便真忘得。憶竹栽蘆強自誇。我自無行即是藏。更將何物要韜光。東澤幸有牛溪在。却向長安說醉鄉。

百錢破釜發長嘆。一局羸棋爲解顏。擾擾自無安脚處。幾人打透利名關。應物何嘗累我真。禪家怖死強忘身。昨朝一讀雍行錄。卻笑當年墮甌

人。漫題乾坤未覺化機停。世態難逃醉裏醒。共見白雲又蒼狗。豈知

# 永樂大典

螺羸即螟蛉

偶作

爲貪風月重登臨。感慨幽懷不易禁。靜裏形神君

與我眼中興廢古猶今。區區此世真何物。落落平生只寸心。聞道江湖好煙水。飛鴻滅沒有遺音。偶得血氣雖衰志愈真。近來溫故覺知新。久



貧多得鄉閭敬。漸老惟於道義親。日月消磨三樂事。乾坤俯仰一閑人。幾  
時卜築唐溪上。分得堯民五畝春。自覺筋骸老漸頑。曾經堅脊度危關。

清霜烈日留身後。秀氣春風拂坐間。自有顛波如底柱。莫教秋色避南山。  
雲鵬稅駕今無地。幾點江鷗盡日閑。耶律楚材湛然居士集敏之學士遠

寄新詩七十韻。捧讀之餘。續貂以尾。聊資一笑。壯年多軼軻。晚節歎行

藏。故國頽綱穢。新朝明德杳。雄材能預筭。大量固難量。迭出神兵速。無敵

我武揚。本圖服叛逆。何止窮禱張。西討窮于闐。東征過樂浪。慧侵天壘塵。

光動太白鎗。整整車徒盛。鱗鱗旗鼓望。天皇深責重。賢帥廟謀臧。江右將

禽楚。河陽已滅商。英雄皆入彀。強禦敢跳梁。採訪軒車開。司農官吏忙。輕

徃常力足。薄賦不財傷。勲業超秦漢。規模邁帝王。流言無管蔡。竒計有平

良。增葺新文物。耕耘古戰場。蛟龍方奮迅。鵬鶚得翱翔。偶遇風雲會。爭依

日月光。永疇千古恥。一怒四夷攘。虎帳十年夢。龍庭幾度霜。迎風初請命。

出郭遠相將。久敵真宜死。寬恩何敢當。赦書民有幸。歌詠壽無疆。扶杖聽

黃詔。稱觴進白狼。散財竭庫藏。拔將出戎行。殷絕仁猶在。周傾道不亡。未

招燕郡內。入覲大倉傍。戎服貂裘紫。星輅較馬蒼。中春辭北望。初夏遇西

涼。瀚海涵而湧。陰山徬且徬。開雲迷去路。踈雨潤行裝。出處空興嘆。風光

永大

自斷腸。典刑陳故事。利病上封章。天下援深溺。中州冀小康。風俗承喪亂。籌策要優長。痼疾如神附。遊魂笑鬼張。仁術能骨肉。靈藥起膏肓。避禍宜緘口。當年肯括囊。遭讒心欲剖。涉苦膽先嘗。北漠絕窮域。西隅抵大洋。詩書猶不廢。忠信未能忘。旣補連腮帳。繩穿朽脚床。郊行長野興。人靜若禪房。回鶻交遊熟。崑崙事跡詳。風煙多黯黯。雲水兩茫茫。災變垂乾象。妖氛翳太陽。髯龍三島去。奕葉一枝芳。明主初登極。愚臣敢進狂。九疇從帝錫。五事合天常。大樂陳金石。朝服具冕裳。降升分上下。進退有低昂。拓境時方急。郊天且未遑。應兵無血刃。降虜自壺漿。案堵無更肆。固敵不餽糧。宸心尊德義。聖政濟柔剛。恩澤涵諸夏。威稜震八荒。勢連西域重。天助北方強。舉我陪三省。求賢守四方。錦衣捐毳褐。肉食棄糟糠。隱逸求新任。流亡集故鄉。百官欣戴舜。萬國願歸唐。耕釣咸生遂。工商樂未央。會將封泰岳。行看建明堂。每嘆才雕篆。長慙學面牆。君恩予久負。賢路我深妨。覆餗恒憂懼。持盈是恐惶。故山松徑碧。舊隱菊花黃。大守方遺馬。初平政牧羊。厚顏居此位。若已納於隍。吟嘯須歸去。香山老侍郎。雲漢遠寄新詩四十韻。因和而謝之。笏爰符大一。天相忝文昌。泛海難追蠹。封留欲學良。穢形伴珠玉。朽木廁松樟。直節心雖赤。衰年鬢已蒼。伴食居相府。無德報君

大永



王草甲濡春雨。葵心傾太陽。大權歸禁闕。成筭出巖廊。自北王師發。平南上策長。皇朝將革命。亡國自頽綱。漢水偏師渡。長河一葦航。股肱無敢隋。元首載歌康。號令傳諸域。英雄守四方。大勳雖已集。遺命未嘗忘。萬國來馳幣。諸侯敬奉璋。兆民涵舜德。百郡仰天光。大有威如吉。重乾體自強。碩賢起編戶。良將出戎行。太廟陳籩豆。明堂服冕裳。宋朝微寢滅。皇嫡久成戎。政亂人思變。君愚自底亡。右師潛入劍。元子直臨襄。殺氣侵南斗。長庚壯玉堂。弓猶藏寶玉。劍未識干將。皇業超千古。天威聳八荒。元戎施虎略。勇士展鷹揚。武繼元封跡。文聯貞觀芳。宮庭敢諫鼓。帷幄集書囊。佇待卿雲見。行觀丹鳳翔。武文能迭用。威德是相當。多士思登用。遺賢肯退藏。詩書搜鳥篆。功業仰龍驤。國用恒無闕。民財苦不傷。八音歌頌雅。百戲屏優倡。聖澤傳朝露。明刑肅暮霜。永垂塵劫祚。一混九州疆。重任司鈞石。微材匪棟梁。思歸心似醉。感媿淚如滂。嚴子終辭漢。黃公合隱商。窮通真有數。憂樂寔難量。雖受千鍾祿。何如歸故鄉。與賈仲論詩。論詩夜夜費膏燈。與奪玄機似衲僧。示我鵬南圓覺海。欲乘桴去未之能。和彥長老絕句。生死與涅槃。都如昨夢耳。覺後笑呵呵。無彼亦無此。只識花瓶盤不識。金瓶盤釵釧本真金。一從打破疑團後。物物頭頭總是心。高庭英索。

永大



詩強爲一絕。一川秋色滿東籬。鴈字行行自寫悲。試問省庵何所省。黃  
花紅葉總堪詩。錄寄新詩呈冲霄。冲霄酷愛王泉詩。媿我年來無好

辭。錄寄新詩三十首。莫教俗子等閑知。松月老人寄詩因用元韻。談

禪講教不知家。芳草漫漫去路差。朽卜虛聲木老鼓。盤星錯認洞山麻。全

無去就論空色。誰有心情說照遮。松月野僧須薦取。釣魚人是老玄沙。劉

文貞公集古詩泛言一百二十一首。天地合二五。蒼蒼皆所生。人爲最

靈物。秉彛初混成。嗜欲既開鑿。昏雜難自明。聖人設教化。同復純粹精。

乾坤六合中。道義皎如日。人心動靜間。應對二而一。爲善有高明。爲惡無

暗室。小人悖之凶。君子修之吉。聖人所定正。易書詩春秋。如天有四時。

不息長周流。集義充浩氣。賢哲知當修。拳拳畧無怠。歲久同交游。是穀

得土生。農夫柰勞苦。時或偏雨暘。功須旋添補。不耘苗不興。助長大莽鹵。

隣翁慶有年。心休生蠹蠱。天地有晝夜。日月或升沉。聖賢平道義。體古

還明今。窮通無損益。一貫存中心。貧賤既不濫。富貴胡能淫。放心宜早

收。無令恣馳逐。安宅寬有餘。正路直無曲。雨露晝夜間。滋息牛山木。血氣

易致衰。嗜欲何時足。人生天地裏。心腹居人中。萬事貴中立。中立無不

通。偏倚過不及。其道非由公。公心普明明。白日懸蒼穹。有身須有心。有

永大

心須有事。有事須有誠。有誠須有至。至者無不通。通者無不遂。遂者存於公。公者合乎義。聖人立人極。法象師乾坤。乾坤周四德。萬物生春溫。生復化。至善榮心根。文藝屬游泳。道義長推尊。天地運四時。四時行萬事。人居天地間。一理貫無二。用事體其時。上下自合志。合志義在中。中在正可示。至道體無朕。一理長分明。廣大備天地。二五合生成。惟人號靈物。乃有純粹精。立極定中正。乾元亨利貞。人欲蔽天理。不明同暴棄。復來還復來。復至無復地。乾坤動靜間。浩然充集義。存神過化時。昭然見誠意。人生一百歲。世事千萬端。今日有明日。取次凋朱顏。詩書同造化。移物勝還丹。少壯當努力。寸晷休虛閑。遇惡改所同。見善遷未及。三人必有師。存心莫偏執。寡過體時中。性成如素習。聖門永不關。肯來皆得入。道義畧無間。時命或有窮。無間必當敬。有窮莫俟通。在此不謀彼。行處惟宜從。雲雷遂經濟。枯草生華風。富貴非永持。人皆有天爵。可求不可求。趣舍無交錯。幸得啓私懷。才術展穿鑿。須知君子心。義外都無託。爲教首孝弟。爲治先農桑。大綱若能舉。衆目還自張。天下本無事。庸人何太忙。春風動黃閣。萬物生輝光。三獻兩遭刖。克誠終不惡。良玉苟蔽藏。足在將何若。紛紜薄子心。盡道古人錯。願學古人錯。莫學今人薄。斜月挂

大永



樓角秋色夜還多。閑雲自巖壑。林鳥思舊柯。青山豈迢遞。白日空蹉跎。春風幾時來。一一吹菁莪。梧高鳳不來。一葉凋金井。幽人想鳳儀。依梧屢延頸。鴈宿蘆花灘。鳥飛明月影。白雲不覺秋。西風江水冷。南山有佳氣。北嶺遙相望。歸禽噪高樹。煙水明夕陽。雲霞淡無色。草木翻青黃。淵明不飲酒。籬菊爲誰香。閑雲不肯飛。戀着西山住。長風不惜情。吹散無尋處。山下有幽人。携筇日成趣。向晚獨歸來。茅齋樂貧素。大賢守易簡。一物曾不差。庸人騁私智。展轉事如麻。千慮苟一得。後世爭相誇。源迷流不返。何處尋歸槎。清泉日夜流。知爾有憑據。盈科還入行。一息不停住。碧雲出山來。不想還山去。佳人望眼花。鴉亂天將暮。高明若有畏。下愚安敢欺。凡生在穹壤。有性寧無知。恃出必恃入。相還如刻期。孟子既不妄。反身奚復疑。絜矩譬良匠。忠恕道不遠。橫逆忽來加。平心宜自反。既直徑可前。稍屈便當挽。君子之德風。何草不能偃。三十至四十。又覺十年非。後事不能慮。今日當知歸。春風吹好夢。踈牖明朝暉。北山存蕙帳。猿鶴久忘機。一水東北流。悠悠入滄海。一山西南橫。青青色不改。中有讀書人。書中見真宰。如收明月珠。暗室生光彩。李白淡蕩士。高明四海聞。爲愛一杯酒。辭却萬乘君。還山酌明月。明月埋陰氛。長風爾有力。爲我披浮雲。

永  
大

可愛王右丞。幽情因畫託。寫出無聲詩。胸中幾丘壑。巖樹綠婆娑。秋風也吹着。日月曾幾何。密葉不凋落。三老煙霞病。沈郎風月愁。各自有佳趣。

未肯同追遊。黃塵滿行路。路遠生白頭。長江鼓高浪。迴舟不自由。峩峩太行山。清清磐谷水。山色共見佳。水味誰知美。去問李先生。萬事果如此。

先生一點頭。無言有微旨。南風差有力。吹散浮雲陰。佳人慕君子。策杖同幽尋。豈無一尊酒。慰此方寸心。明月來相照。歸鴉集暮林。群水爲誰

流。孤山能自立。寵辱不驚心。到此要熟習。玉井有清泉。百熱除一吸。渴者莫號呼。綆短苦難汲。駟馬相如貴。六印蘇秦還。漁父不識字。長伴鳧鷖

閑。汨沒是非裏。奔走塵埃間。十年不改舊。青眼望青山。風雲慘淡中。干戈橫五季。希夷隱華山。昭昭見天意。百川自東流。孤蟾亦西墜。扶桑日出

來。齟齬猶鼾睡。紈袴仕宦內。布衣稠人中。不謁萬金富。甘受十年窮。詩吐清明氣。酒澆磊磊胸。百尺高樓上。幾箇陳元龍。海東有蓬萊。神仙居

絳闕。閑人一草廬。無才罷干謁。萬籟寂不聞。孤雲亦知歇。虛室生清光。高山吐明月。木落不怨秋。花開那謝春。榮謝自然道。誰是道中人。道人不

可識。滿目飛黃塵。荆山雖有玉。水淺石磷磷。落花不着枝。啼鶯不緘口。東風未肯閑。溪邊弄楊柳。幽士一茅廬。塵路厭奔走。枕上看青山。薰風入

永大



南牖。小池流水細。皓月秋風清。風水一琴響。月池雙鏡明。天晴夜寥廓。斗轉參斜橫。吾家樹枝穩。烏鵲緣何驚。孤心應有憐。萬事但無柰。歸雲入好山。砥柱謝頽瀨。清泉灌稻畦。生涯非分外。冥鴻任往來。天宇自寬大。孔子有美玉。韞匱而藏諸。善賈是貪利。有求無不沽。中年亦云往。九夷皆可居。我不孤天下。天下寧我孤。寡言養精神。多慮困心力。忘情不及情。鮮有中庸德。守六知地貞。用九見天則。自反既能縮。所向無寬窄。獻書自可薦。選士果誰賢。宰相調九鼎。將軍安四邊。北溟有鵬化。南山無豹眠。子孫千世乾。乾坤萬萬年。地庫藏寶刀。天機織雲錦。錦成刀所截。段段稱絕品。製為天子服。用人要詳審。萬一得其人。九重可安枕。聖人揭日月。小子囊螢光。照照不能遠。飛飛空自忙。誰啓聖人道。能止小子狂。來此日月下。置彼收螢囊。鳳凰食琅玕。烏鵲啄糠粃。試與琅玕食。掉頭終不唯。欲問何所為。只知糠粃美。儻有食之者。必是鳳凰子。賢人輔九五。天下歌升平。一朝開正道。萬古垂鴻名。名為世所尚。道乃人當行。道行名自行。苟取失天成。名器慎所守。非人覆公餗。有功然可封。無德豈宜祿。勿矜才有餘。當憂道不足。能用心休休。天下皆受福。為愛山中境。長見山中人。山人解服鍊。體健心無塵。流泉既清耳。孤雲還伴身。相邀坐孤石。

永大

曲

永樂  
大  
語默而情真。潺潺何處來。漚漚清人耳。尋聲到山腰。有泉漱石齒。兀坐聽不休。天地皆同水。日暮下山來。山上白雲起。間闕林中鳥。優游波上魚。不知有弋釣。緣近道人居。道人日蕭散。魚鳥長自如。飛花飄戶來。亂點讀殘書。枝頭載好音。黃鸝初弄舌。春工物色華。處士生謀拙。囊空無一錢。吟嘯當佳節。楊花不肯飛。堆作堦前雪。江海繞關塞。車馬衝塵埃。功名果何處。萬里勞英才。梅逐雪飛去。柳傳春到來。若無一樽酒。懷抱賴誰開。白石不可殮。青山未能逐。富貴吾有天。賈竈豈當媚。秋風自西來。未忝搥黃穉。東家酒熟時。爲我留一醉。幽林通一徑。中有野人家。不知堯舜道。耕墾爲生涯。父祖有遺訓。農事勤桑麻。爲問何時節。桃李始開花。車去馬還來。充塞長安道。一自鬢生華。五湖歸豈早。行客雨晴時。共愛青山好。却恐住山人。不肯山間老。草舍清溪上。車馬少經過。江山麗春日。鳧鷖戲晴波。東風弄楊柳。好鳥來吟哦。歸舟沒煙靄。隔岸聽漁歌。何物比君子。牕前幾竿竹。夢斷落雪聲。清風滿茅屋。簞瓢生有涯。顏子自知足。春來桃李花。紛紛動人欲。曉月當牕白。薰風到枕清。驚破幽人夢。樹頭聞鳥聲。起來催盥漱。案上書縱橫。開卷得餘意。惟自知幽情。冰泮百川流。春來萬花發。清風動黃閣。麗日明丹闕。不飲貪泉水。誰憐首陽巖。遠客



幾時歸。子規啼曉月。秋霜徹夜飛。肯恤山前草。孤松倚北巖。千年不枯槁。至誠久自通。天地有常道。悠悠世上兒。只見眼前好。宿鳥落高樹。夕陽下弊廬。亂峯雲覆盡。道者靜看書。得意首頻點。無言心亦虛。世情難混雜。不是與人踈。葉落林自踈。林中見來往。豈知林外人。天地更高廣。羲和行四時。萬物有消長。青雲照碧溪。古今同俯仰。眉頭但舒展。生涯頗有些。十年何所積。文書載五車。富貴眼前花。開卷自能遮。出門見新月。一曲玉橫斜。天地設如機。日月忙於織。白髮換青絲。生謀太相逼。蝸牛兩角間。抗敵觸蠻國。紅白桃李花。隨分有春色。青女侍白帝。夜作秋霜飛。草木盡黃落。松柏獨何依。地白江山老。月明星斗稀。憑誰把鄒管。爲我喚春歸。東園勝可游。長携一壺酒。天地豈無情。春風盡花柳。將尋桃李蹊。幽禽喚回首。午醉乍醒來。城樓橫北斗。氊帳靠林水。清勝讀書堂。白雲自來往。六合包混茫。人皆惜春色。我亦憐時光。千金買不住。老却富家郎。曾遇終年飢。菽粟亦知貴。若受三冬寒。細絮肯輕費。淡淡聖賢言。省來真有味。臨事能不差。天地入經緯。行雲不行雨。長繞陽臺飛。高唐夢已斷。巫山空翠微。宋玉謾爲賦。仙娥何處歸。此事果非誕。淫風禮所譏。織女連夜忙。衣裳未遮赤。田夫帶月耕。朝夕無米喫。私家亦云贍。官中輸歛

# 永樂

大曲

急。都城買笑郎。千金不愛惜。君子有佳會。由禮相追陪。時當置肴核。要與春風期。酒歡不在醉。莫訝盃行遲。桃李侍明月。人生多別離。事冗貴

閑人心。孤慕良友。松泉暑夜涼。寬襟一盃酒。薰風捲薄陰。明月入我牖。誰似陶淵明。彭澤謝官守。羲和挽六轡。舒此夏日長。薰風何處來。惠我南

牕涼。詩書在前几。開卷心生光。富貴是何物。世路爭奔忙。策杖過前村。

黃雲看禾稼。行行重行行。行到西山下。都城人事多。飲食曾不暇。念此百

年身。合得幾時假。禮一分有殊。尊卑蓋天命。萬世錯亂門。立名皆自正。

治國如養生。飲食要溫清。元氣若能調。五臟安得病。寬猛政事和。賞罰

善人進。蒼生際海隅。十室有忠信。知可便當行。見弊宜且順。萬事不剛生。

到頭無悔吝。開國賴王師。經邦在良弼。君擇將相二。民歸法令一。臯陶

格有苗。周公戒無逸。茫茫天壤間。得人諸事畢。井田既不分。誰肯各安

分。一無儋石儲。一有萬斛運。穴蟻已知歸。冥鴻更求進。一日利源開。千年

塞不盡。先行言後從。言行本無二。當用忽羞池。却是兩件事。海棠花無

香。玫瑰條有刺。君子慎樞機。下流多謗議。服順自勞謙。攘奪生不讓。長

峽傾瀑流。滄海有容量。百司籩豆間。三公廟堂上。巖巖南山西。赫赫萬夫

望。陽春足舒暢。嚴冬苦悽慘。東風儻有迴。萬物有深感。天君子自爲。日

永



月代周覽。高明既聽卑。誰非露肝膽。禮義不自持。機防爲誰險。善小尚人稱。惡大定難掩。言行君子樞。顛沛要拘檢。一出難再追。所生安可忝。語默非不誠。寸心惟自得。人情利害間。萬牛空費力。昨日園中花。今朝路傍棘。四海皆兄弟。誰是真相識。金石亦要穿。忠義果如此。忘身遺道行。虛名半張紙。誰云生可輕。事蓋有當死。嫂溺不爲援。斯豈人情耳。藉地用白茅。君子過於厚。疾惡矜不能。仁心人固有。浮生都百年。損益在三友。客從遠方來。木李報瓊玖。天地總生成。羲和調四運。邪正忽交差。陰陽有逆順。暑氣千春溫。牛喘恐行近。蒼生喘更多。邴公胡不問。赤子將入井。游絲命懸死。客從何處來。趨救如有使。餘情豈暇生。惻隱自及此。乃知人心仁。不獨子其子。老黃拜後將。關公恥同列。使以親舊諭。能變怒爲悅。一語開人心。萬事自明徹。千里未同風。連床無話說。今人有聲詩。古者無瑕璧。詩傳璧可懷。兩物俱當惜。東西十五年。只作塵中客。詩不堪壁論。路人多眼白。青女行雲秋。籬菊開金餅。姮娥在月宮。盛比人間冷。詩容未忘情。得句忽如省。驚鳥不肯眠。庭梧轉踈影。以殺若止殺。離離愈難雪。四海聞兵威。草木沾腥血。願天生獮獸。食盡人間鐵。無以鑄兵器。戰爭應自絕。游魚樂水深。歸鳥忘林迥。飛潛固不同。所適情無等。達人無已。

永大

事山林在鍾鼎。紛紛嗜欲間。恬淡定誰肯。太山膚寸雲。須臾徧天下。中有行雨龍。祈祈濟枯稼。如何稂莠姿。越壠敢相跨。孔明荷鋤歸。茅廬自開暇。虎狼亦有仁。同類不相食。人生天地間。往來幾能息。大路偶遭逢。何暇裁荆棘。行程大家忙。轉首各南北。乾坤處處寬。萬物自促促。蝸牛兩角間。戈戟未曾息。古往今又來。到底誰爲得。青山爾何能。束手摧群力。本是山中人。長作山外客。幾年不還山。頭髮半斑白。鴻去又鴻來。寒暑太相迫。鵬飛不到邊。誰謂乾坤窄。白璧本無瑕。相如元妄作。連城既不還。奪與有何錯。後世少窮源。汭流漫穿鑿。私智得縱橫。丹心總難託。春從何處來。楊柳黃金色。堂前燕子飛。恰似曾相識。碧雲望眼中。佳人沒消息。青山一片石。目斷情無極。明河天上流。還向地中落。地神不能收。放出一杯杓。源源成江湖。漫漫通海漠。蒸氣化雲騰。結爲雷雨作。忠義萬世推。豪放不足法。晉人踈禮度。謙恭爲福狹。如意擊珊瑚。稜稜氣相壓。迷途不知反。社席動戈甲。秋霜着菊枝。夜雨打梧葉。幽士一檠燈。文書苦涉獵。青雲惜蹉跎。白髮歎勳業。隣兒不識字。夢斷雙飛蝶。明月不可攀。去地八萬里。姮娥住月宮。孤清更誰比。幽人步閑庭。夜色涼似水。足下玉塵生。薰風吹不起。閑情與時適。野興臨溪多。斜陽在高樹。鴛鴦浮清波。春

永樂

大



光輝花柳好風來自和。孤舟沒煙靄。隔岸聞漁歌。爲善蓋本分。成功皆  
偶然。脚下自有地。頭上誰無天。萬事莫勉強。一誠須精專。盡其在我者。鷄  
蟲非所偏。天地兩儀間。君子有容德。誠厚發中情。詩人辭不逼。干將與  
莫邪。觸物豈常克。上善非善爭。袖手推鋒力。侵晨一杯酒。暖氣如還丹。  
霜風飄沙漠。不覺衣裳單。歛歛面上熱。綽綽心頭寬。若得海爲酌。應迴天  
下寒。今古混茫中。誰能窮鄙美。孤憤與獨醒。入我寬懷裏。一日醉一場。  
百年都有幾。秋霜上鬢來。春風吹不起。旣往莫能挽。將來還許思。只除  
打見在。一日十二時。遇酒醉於酒。得詩聯作詩。物情各自適。天意元無私。  
神壺容宇宙。槐蟻夢公侯。說破不爲恠。一笑長江流。高峯有明月。桂寒  
風露秋。芻筇步庭際。聽遠啼猿幽。騏驥困駑駘。蘭蕙蔽蒿草。懷才遜世  
者。豈愛林間老。善道不容行。浩養樂天保。儻有乘時爲。佩玉心如槁。山  
澤先龍蛇。窟穴聚鼯鼠。不肖與仁賢。豈可同時語。寒鴉集暮林。孤雲去無  
侶。德輶一鴻毛。鮮有人能舉。尺蠖屈求信。龍蛇蟄存身。胡爲不前進。賢  
者恐傷仁。顏淵惟樂道。原憲不憂貧。優游任時運。未見德無隣。百年駒  
影過。一袖野情幽。順友開三徑。從塵飛九州。有山橫眼外。無事寄心頭。勿  
道閑人貴。閑人只自由。朝陽山色麗。秋吹水聲清。欲上雲峯去。還登石

永大

路行。搯筇林下憇。聽鳥樹頭鳴。無人知此意。一笑自為情。煙霞緘畫夢。一覺睡何甘。忽被風吹破。清人月滿庵。出戶看天色。斗柄已廻南。驀見松

搖影。只疑龍出潭。高望四無樹。虛心地寬。無聲風裏鳥。飛上白雲端。

孤山枕林水。細路之盤桓。夕陽添暮景。更與好生看。山蹊雪更覆。岩室

雲猶封。不是樵夫慣。幾人能得通。焚香坐白晝。飛鳥盤高空。細聞無調曲。

澗下有松風。欲道却不道。匪癡常似癡。儘教人話笑。自是我心知。補袖

既遮體。麤飧又解飢。固能貧且樂。安敢強施為。元劉秉忠讀李杜詩集

因作適時歌。以呈諸友。讀杜詩增人愁。誦李詩銷我憂。李杜文章一元

氣。回旋萬古開。冥搜文經武緯。絜天地。輔贊化育。猶公侯。愁復愁。何有愁。

憂不憂。何無憂。主上蒙塵。盜賊橫。父子隔絕。烽煙稠。壯士空家。苦戰役。老

弱十九生。難求。杜老當此際。意遠身悠悠。雲翻縮骨絆。風蹄局淹留。致君

不能到。堯舜為。臣未得同伊。周名列朝官。事難濟。誰能一笑伸眉頭。翰林

# 永

本是騎鯨客。謫仙下落塵寰囚。醉巾斜岸見天子。援筆揮洒江河流。白壁

不受青蠅點。脫羈嘯傲吳山秋。玄霜清夜洗餘滓。世俗擾擾真囂啾。瑤池

王府舊行處。安期為友盧鴻儔。黃塵際海飛不到。十二闌干明月樓。鳳凰

# 大

麒麟類鷄犬。豈有豺狼當路遊。贏得半生開口笑。葡萄酒酌玻璃甌。人間



遭旱未欲槁。未願坐視沉良籌。直鞭赤龍稟上帝。倒吸天漢噴神州。歲寒  
松柏轉青翠。又看新月橫銀鈎。時乎時乎各有適。且須落魄崑崙丘。讀  
杜老上韋文詩。六合風雲慘淡間。丈夫多笑誤儒冠。戲排趙壁韓爲易。  
笑却秦軍魯豈難。軒鏡上天昏靄破。隋珠投地夜光寒。死酬知己方無憾。  
寧惜千金報一餐。讀工部詩。工部文章萬彙全。煥如星斗羅青天。差  
居三百五篇後。傑出數千餘句前。良金美玉有定價。殘膏賸馥無窮年。當  
時驅駕誰能並。只除太白騎鯨僊。少日曾師杜審言。青逾藍處得非難。  
清雄騷雅隨情賦。遠近洪纖着意看。但諷數篇真可老。九亡一字莫能安。  
漫漫一似滄溟水。無限鯤鯨吸不乾。再讀杜詩。規矩方圓稱物施。運  
斤風度見工師。千霄氣象動高興。際海波瀾生遠思。三月間韶忘肉味。幾  
年疑郢和巴詞。騷人盡在清光裏。恰似中秋月滿時。再錄杜詩。深造  
入龍頤。初觀見海波。闕遺前輩少。沾漑後人多。地藏琳琅窟。天機錦綺梭。  
元非夢含彩。文思自懸河。詩律嚴軍律。縱橫出沒齊。包荒一天大。望嶽  
衆山低。句驟無淹韻。才開盡着題。數篇真可老。白壁滿幽棲。賊盜起如  
草。戈矛森似林。竄身常迫難。感物不忘吟。關塞思君淚。乾坤許國心。敬傳  
金石語。萬古比虞箴。讀百一詩。家中陳穀換新絲。肥馬輕裘富貴時。

# 永大

寒女何曾秉機杼。飢夫元不輟耕耔。田文閑養三千客。應璉徒吟百一詩。欲歎帝闈閣者怒。茫茫下土是誰司。讀招隱詩。山谷委蛇絕世塵。風

來蘭蕙發清芬。垂絲舞柳啼幽鳥。漱玉鳴泉躍細鱗。嶽頂卧觀滄海日。蘇門嘯遏太行雲。巖前松栢長青翠。不覺人間秋復春。讀東坡詩。翰林

工部俱云沒。天上詩仙更有誰。無滯曾懷長灑落。多才言語自新奇。南遊大得江山助。北望逾驚牛斗卑。萬斛冷泉隨地有。決來應手作陂池。又

讀東坡詩。言有條章動有儀。風流人物古今稀。自傳蘇氏文星耀。便覺眉山秀氣微。春樹蒲園堆錦繡。冷泉萬斛瀉珠璣。眼看鴻鵠摩霄去。鷗鷺

無田共奮飛。讀山谷詩。清竒淡雅總功夫。句句冰霜字字珠。並舉鴻方上霄漢。相忘魚已得江湖。筆端應有神靈助。言外全無翰墨拘。酒醒夢

回秋氣爽。似看明月在蓬壺。讀遺山詩。情發聲調節作文。溫柔敦厚見詩真。離騷九變能堪尚。屈宋前頭更有人。兩岸桃花夾醉鄉。春江渺

渺月茫茫。謫仙詩思難籠罩。仰羨雲霄孤鳳凰。秋風夜雨布衣單。破屋猶憂天下寒。不料世人多莽鹵。久教吾道屬艱難。雲霞閃爍動霓旌。轟

磕征輦震地聲。千里折衝歸指畫。將壇孫子獨論兵。劍氣從教犯斗牛。百川橫放海難收。九天直上無凝滯。更看銀河一派流。鶴揚清唳過華

永樂

大



亭。銀漢無聲轉玉繩。夢斷一軒明月在。令人心似玉壺冰。編排一字有高卑。就裏功夫作者知。自古文章貴辭達。蘇黃意不在新奇。公論元無

擅否臧。過情聲聞可承當。杜詩韓筆顏書字。不待人言自發揚。北里笙

歌勸酒盃。南隣門巷冷如灰。秋風萬里方搖落。叫殺孤鴻春不迴。再讀

遺山詩。人沒詩存重與看。芳馨不死比芝蘭。生前富貴雖平淡。身後文

章已渺漫。蜀錦絲頭從此細。蓋遺山見愚狂作。常語世昌日。他日自細去。

既而賜到錦機。故此及之也。巴歌韻脚自來寬。未言雪曲無人和。傳者幾

希作者難。細讀遺山詩。句法縱橫得自由。清新俊逸出常流。天機雲

錦三千段。月字星名四百州。未得深源傳正派。謾將鄙語入冥搜。何時五

彩生肝肺。轉問江淹乞筆頭。一集新詩動九州。宮中才子謝冥搜。文章

皆曰有司命。江漢自來無斷流。錦綉堆前難措手。琳琅窟裏懶迴眸。方營

草舍遮風雨。誰敢添修五鳳樓。集諸家詩。好詩不在眼。俗語難留心。

璞內可分玉。鑪中還得金山尊。春嶽大水會滄溟。深妙曲含琴瑟。發揚期

大永

賞音。讀唐人詩。風雲飄逸意何速。金玉鏗鏘聲自清。蜀錦正驚裁剪

碎。溫針還解貫穿成。苦吟應有秋蟲和。好句定隨春草生。六義班班風雅

變。賴斯陶寫古今情。為覺大中言詩。李杜蘇黃韓與柳。六家詩體混

中殊篇篇得在功夫外。字字成於鍛鍊餘。便許後人翻格律。須將前輩作規模。擬心要到縱橫地。下手先開萬卷書。烈火爐中匠手橫。真金百鍊益精明。如君好事有幾箇。似我為人空半生。語不貴奇惟在當。事休涉誕只宜情。春花秋草疏條罷。造化無窮看混成。舜典後爲三代接。關雎首向二南開。變風自衛漸如此。大雅至秦安在哉。蓋世雄文韓子學。驚人佳句杜陵才。詩家體面儒家法。豈曰無師討論來。愚有真誠告覺庵。詩家論句類禪參。粧塗必賴青黃赤。壘堞元從一二三。獨立未能竿莫上。空行不解板須檐。佗羊若契環虛處。別爲迷人作指南。近詩詩如雜劇要鋪陳。遠自生疎近自親。本欲出場無好譚。等閑章句笑翻人。聽魏仲平誦詩。五雲宮闕隔三韓。塵世何人得往還。勁鶴豈辭天路遠。長鯨曾吸海濤乾。盡期王子登山頂。誰想麻姑在坐間。細嚼一言堪換骨。仙家壺內有靈丹。口號眼大心雄志有餘。功名富貴不勞圖。癡癡休學小兒女。挺挺須爲大丈夫。天地五常元一理。廟堂三老豈多謨。閑來試把詩書看。道義分明見也無。自得共有詩。詩書味美淡功名。血氣方剛愛慎輕。知所當然惟自得。勇於不敢復誰爭。海棠月上傾壺飲。楊柳風還策杖行。春色無私人共有。閑吟閑醉遣閑情。吟詩七情荒泆難追雅。六義淪

永大

曲樂



紛始變騷。句穩先須辯長短。字工端要定推敲。言非精當功應少。意不包  
含氣謾高。脫手若能圓似彈。千迴萬轉任吟嘲。帷裏吟情含畜厚。胸中  
造物混茫開。拈時輕快功夫到。得處平常磨鍊來。騷雅清雄隨事賦。縱橫  
長短可題裁。癖成未有驚人句。馬上窻前愧不才。雜詠詩漫與東風

作主人。栽培花草伴閑身。不辭接竹成高架。收拾薔薇一片春。洛川春  
色幾時歸。漾漾清流照翠微。日暖雪消沙岸軟。鴛鴦相對不驚飛。樓上

鳴鍾報五更。濛濛深殿佛燈明。更無幽夢隨寒枕。聽徹松風到曉聲。雜  
詠五更殘夢一聲鍾。盡在膠膠擾擾中。世事倒流三峽水。人心橫隔九

疑峯。一時富貴求何晚。幾冊文書讀未終。盡日掩關塵垢裏。儘教奔走笑  
踈慵。寄友空勞尺素書。投人多駭夜光珠。巫山搖落難藏鹿。渭水澄清

易見魚。未卧煙霞歸海島。欲栽桃李傍江湖。年來生計如何耳。留得床頭  
幾冊書。檀帳蕭條靜看書。萬機那識此心虛。無才把事相料理。有酒將

愁總破除。巖下優游輸四皓。江邊憔悴笑三閭。從來渭水清如鏡。垂殺直  
鉤得幾魚。山崦孤城背夕陽。戍樓寒角送悲涼。嚴陵不預風雲會。李白

那為翰墨場。投樹棲鴉千萬點。書空征鴈兩三行。興來賴有床頭酒。一曲  
高歌入醉鄉。秋水澄澄照影孤。百年逆旅轉蘧廬。聊生莫問鳩為計。憶

永大

遠須憑鴈寄書。北海鯨魚鈎已重。中州麟鳳網猶疎。清愁萬丈干雲月。著酒澆來自破除。萬家砧杵動長安。應念征人塞上寒。映月蘆花堆作雪。經霜梨葉煉成丹。五株色敗門前柳。九畹香存院後蘭。秋思偏來攪曾次。醒時長窄醉時寬。王京爭上最高樓。佳節重逢九日秋。一別龍山風落

帽。幾逢鴈塞雪飛裘。今朝白酒人宜醉。明日黃花蝶也愁。獨對一壺酣飲後。餘杯留着再扶頭。地雄西北帝王州。一月登高那未休。紅葉黃花空

應節。蒼山白草不勝秋。寒風無謂頻吹面。破帽多情却戀頭。恰遇鄉人來送酒。淵明不醉復何愁。織錦文章學不成。更堪斷句覓詩名。黃華陡覺

泣秋思。白酒良能解宿醒。月底關河家正遠。樓頭鼓角夢初驚。尺書寫下還慵寄。初動風前鴈一聲。山前滿目聚成圍。汾水悠悠鴈北飛。一枕黃

粱新夢斷。十年華表昔人非。煙霞有路迷芳草。桃李無言笑落暉。明日征鞍定何處。春光正好不思歸。郝經陵川集雜詩。縱橫十萬里。悠悠總世

塵。勞生爲物役。往往失此身。對面皆九疑。惟有酒相親。花開社甕熟。春風滿比鄰。痛飲有高曠。暮夜達旦晨。君看雞窠中。豈有百年人。種豆南山

歸。放日陟高嶺。雜田似蔬畦。繡錯成野景。日夕卧柴荆。破屋風露冷。床頭有餘醪。渴飲興味永。月出流清輝。起舞動孤影。呼兒讀離騷。載酌幽懷騁。

永明

大



醉眠踏曉日。獨樂靜中靜。天命端可樂。物情孰能量。開軒受西風。明月照我房。悠然中聖人。載酌夜未央。哀鴻忽遺音。底事昔隨陽。遂令不飲人。反側斷中腸。三代祇周孔。漢末有佛老。汨真復翔僞。彝性遂不保。涇渭混濁清。原隰易濕燥。世多喪心人。死病不辨早。洎滴成江河。毫末遽合抱。六合一榛荒。浪走無正道。丹山九采鳳。有道即游豫。阿閣與岐山。和鳴復高翥。一從休德衰。轉翮遽揚去。高賢亦違亂。好遯有深慮。冒出犯難行。宵人肯爾恕。幼安遼海居。龐公鹿門住。條然遠世塵。豈復有憂懼。展禽黜不去。子文無愠喜。爭如卧雲窻。遠棄人間事。淵明偶束帶。初無仕宦意。酒熟遽告歸。佳期恐難值。散髮山月清。濯足溪流駛。把菊見南山。物我有廢置。大道初坦平。柰此世路迫。劫灰到重泉。兵塵滿阡陌。乾坤一戰場。血盡骨更白。何處著此身。重覺天宇窄。獨立萬物表。祇有雲門客。弋人忘冥鴻。此中是安宅。道人守化根。靜境深苞桑。單衣不掩骨。一食恒糟糠。何心到文繡。更不願膏粱。真風出樊籠。太和蘊元陽。中襟既忘幾。外物奚能傷。矯矯離群倫。宛在天一方。尊中有奇樂。一詠復一觴。西北有佳人。飄飄碧雲端。悠悠與神俱。冉冉從化遷。偶來住人境。結廬青山顛。更不煙火食。祇把晨露餐。我欲從之遊。路遠縈塵緣。迢然歌紫芝。重寄歸來篇。

永  
大

聖作尚簡易。古道皆若稽。叔季私煩苛。平地生巖崖。生民入罟獲。慘慘傷予懷。孰能與蠲除。變亂益盈彌。神農設教益。庖犧初取離。靡不漏吞舟。豈能強冒羈。謀利因管商。遂使天質虧。夷則弛炎律。廊廊高天涼。我作清夜遊。步月上河梁。蛩吟煙露根。鴈翔風水鄉。商聲激孤衷。銀漢零飛霜。向不酌酒樽。柰此秋興長。溪風吹竹花。石壁墮松子。山氣清入骨。雲嶠時猶倚。奕奕靜中趣。超超物外理。趙孟頫松雪齋集雜詩 四時更代謝物化常隨之。春華曾幾何。歲月忽如茲。嚴風動高樹。百草俱已衰。人生况有役。憂患乃其宜。棄捐勿復念。出入由化機。安得松喬術。邈焉世相違。絕句 春寒惻惻掩重門。金鴨香殘火尚溫。燕子不來花又落。一庭風雨自黃昏。湘簾細織浪紋稀。白苧新裁暑氣微。庭院日長賓客退。蒲池芳草燕交飛。摧落山川草樹稀。白雲時逐鴈南飛。苦無綠酒酬佳日。猶有黃花媚夕暉。梅花半落雪飄零。楊柳青青江水生。一夜東風吹鴈過。江南江北總多情。陳旌安雅堂集題楊顯民米詩卷後 夢游洞庭野。斜月映踈星。軒后來張樂。伶倫吹鳳笙。夢回憶其音。幽眇有餘清。截竹學作聲。向人皆不聽。東南有高士。洗耳卧巖扃。涼風鳴松林。石澗響琤琤。何日即與語。曠焉千古情。向余在京師。有詩寄揚州陳新甫云。東華塵土滿貂裘。

永大典



芍藥園邊繫綵舟。二十四橋春似海。令人腸斷憶揚州。比新甫來錢塘。索  
余更作三首。天下英賢皆願仕。山中隱者盡登朝。淮南春草無端綠。公  
子歸來不可招。別來春夢繞東城。華屋銀尊對雪晴。坐客風流誰得似。  
啼鴛新曲度閒情。去年病客卧淮舩。故人不來心惘然。今年過我即復  
去。夕陽籬外馬翩翩。白南恩詩。白侯忠信多才畧。故遣分符到海涯。  
西漢幾人循吏傳。南恩千載去思碑。閭閻安輯科徭省。城野高深盜賊衰。  
人望次公今柄用。公名寧損蒞民時。許左丞游衡湘泛瓊瓊江。至東岡  
書院鳳山。山長何明初來謁。公爲詩與之。時公被召還朝。而明初携所得  
詩來京師。居數月南還。公屬余次韻於卷末。鄴侯謾愛衡湘好。出處那  
能愜願私。詔使已辭龍尾道。相君方寫鳳山詩。堂依翠篠川如玉。坐列華  
簪室有芝。東閣只今文物盛。幽人何事嘆歸遲。題白玉蟾贈劉丹晨暑  
月詩後。玉蟾先生列仙儒。夙昔夢見冰雪如。丹晨不比劉師服。彌明本  
解人間書。紫清午榻松陰冷。俯視塵寰真火井。銀河夜靜浴明月。水風吹  
落玄雲影。玄雲盤屈龍虎章。百神守之不敢將。友人記余少作因錄之。

永大

溪村積水生寒煙。書廬睡起清明天。隔溪暮哭人飯鬼。膝間燒錢野風  
起。酒旗山前雨踈踈。來禽花低飛鷓鴣。荒墳纍纍出新草。草長如人人又

老東門大道青楊間。可憐車馬無時閒。  
藏六詩為林恬齋作。禹燥中  
野螭欵洛。流水青黃背疇錯。五舍九六中筭約。舉六藏之九斯作。人言天  
地猶橐籥。陽氣流行鬯旁薄。蛇甘即且蝟辱鵲。子能  
深致有真樂。陽精純凝乃脫郭。掉頭不肯支床脚。

永樂大典

永樂大典卷之九百一



# 永樂大典卷之九百二

二支

詩 元詩四

元虞集道園學古錄無題 夏簟琅玕冷於水。綠鞵烹魚手操匕。西風歸

燕杏梁深。恨不身先貴人死。 貝闕珠宮夜不眠。露華浩浩月娟娟。不應

又作人間夢。窈窕吹簫度碧烟。 賦范德機詩後 玉堂妙筆文游盡。投

老江南。隔死生。最憶崖州相憶處。華星孤月海波清。 題文丞相詩後

大厦明非一本支。區區未忍聽傾危。故人邂逅聊相問。矢死終天更不疑

偶成 野田閑水浸秋天。隨意行吟到水邊。樵牧各歸魚鳥散。微風吹

面鬢蕭然。 半畝秋天近石床。金爐自炷水沉香。新涼透骨清如水。幾箇

蒼簑共夜長。 鶴骨新來怯曉寒。東牕睡覺日三竿。蒲團深坐香如縷。塵

几殘。經亦倦看。 絕句 城南尺五野人居。六月清陰八月如。一色琅玕

三百箇。猶堪裁作殺青書。 與趙伯高論詩 莫道幽人有意吟。緣情生

變苦推尋。奇雲映日書成字。靈響盤空譜作音。春鳳雖難天廣大。秋蛩唧

唧雨陰沉。性情平澹隨時見。禮樂何曾繫古今。 陳立來求詩法 拙踈

永樂大典

曲

永樂大典

生理歎衰翁。食粥何妨甌。屢空驚見殺。雞供季路。喜看載酒問揚雄。畫圖乞與千山雪。詩法傳來滿袖風。令子讀書誰得侶。高閭甘旨不憂窮。陸子

方集次善卿雜詩。貞女不自媒。蛾眉爲誰掃。春風吹年華。閉戶綠芳草。

靈脩不我顧。覽鏡紅顏槁。焉得北堂萱。聊用寬憂抱。又懼青蠅讒。善使黑

白倒。遂令親者踈。我欲早有昊。東坡譏舉子。有類候蟲鳴。退之譏詩人。

謂作蒼蠅聲。制策直而核。聯句新且清。自作復自譏。持論終未平。無人解

此意。起我懷古情。蛙從井底語。豹在管中見。若遇大方家。一笑真自獻。

饋漿意已驚。抱甕力殊倦。因知巧若拙。頗覺狂次猶。玉以德保瑕。珉以多

故賤。火雲吐赤日。早勢千里闊。古人救荒術。貨食知本末。家家筭口賦。

殆類僧持鉢。激水活肆枯。植木蔭道暘。諸公善努力。赤子正飢渴。棄兒

啼草間。瘦妻卧路傍。公廩已告匱。私戶猶多藏。嗟哉守錢奴。盜竊勢且昌。

莫保千金軀。汝富安得長。鍊炭不及炊。實玦空自將。獨有黃巾寇。不入鄭

公卿。高賢古所貴。薄俗今可傷。雜書五首。田叟不知書。指望升平年。

一生把鉏犁。忽聞鑄戈鋌。早晚征徃起。驚訛走相傳。腐儒寒窻下。風雨正

勦眠。夜半更相呼。巷南連巷北。人語何喧喧。陰風何宰宰。猛虎下山來。

安尾逐不得。村中鷄犬盡。行擇小兒食。何處人夜歸。一犬穿籬吠。信信

# 大永

一生



聲四起似各應其類。月寒人影空。帖耳循牆去。家家防穿窬。披衣不得睡。秋聲何颼颼。乃在枯柳邊。疇昔韻鸛鷓。歲晚棲窮蟬。張緒少年時。春風

正可憐。流光不相待。白首淚潸然。定遠未封侯。發憤投其筆。老儒七十餘。毫秃手不釋。才器有長短。志趣各自適。遙思玉關外。萬里風沙隔。絕

句。車薪勝盃水。與羽重鈎金。物理元無定。權衡只在心。買絲綉平原。擬金鑄子期。君子病無能。不病人不知。杜欲誅雲師。韓將訟風伯。水旱

不由天。那是詩人責。偶作 奸雄往往墮危機。成敗安能論是非。空笑狂生投益智。絕憐老母遺當歸。次伯機絕句 梅天風雨一江寒。濕却

灘頭舊釣竿。自着漁蓑沽酒去。路逢賈客問長安。偶書 憂時耿耿丹心在。無事悠悠白日過。萬里山河音信少。一春風雨悶懷多。舊題 贖

得清明一半春。蜂衙蝶使往來頻。東風自動鞦韆索。不見海棠花下人。偶題 少年不更事。新學多誤人。桓冲成繆語。張禹豈純臣。旋沽臘醕

供園菜。小簇春盤擷土蔬。老子興來猶不淺。故人病後肯相踈。遠書每勸加餐食。新學多承問起居。大息吾年餘幾耳。閒愁不樂復何如。王文忠公

永 大

集讀唐百家詩選。風雅變漢魏。近古猶可取。六朝傷綺靡。道喪亦已久。子昂振高風。感寓傳不朽。李杜俄繼興。英名擅星斗。夫容照初日。亦有韋

與柳衆賢復炳燿。升堂窺戶牖。森然群玉府。煥若春花圃。嗟嗟大曆還。制  
作半好醜。端爲垂世規。區別豈容後。荆公選詩眼。政如經國手。自用一何  
愚。美惡頗雜揉。驪珠時見遺。魚日久爲寶。唐詩觀此足。誣人何大厚。誣人  
寧此詩。感嘆重搔首。病中偶和韋蘇州詩。黃鵠戩短翮。爰集江之涘。

海鷗愴相忘。脩然亦戾止。抱瘵呻吟餘。擊缶歌下里。忽聞陽春曲。南薰泛  
綠綺。龍門萃髦彥。楚材稱杞梓。迭奏正始音。窈眇諧宮徵。皇風藹清穆。大  
路平如砥。言觀麗澤象。惇惇勗多士。堅貞瑩圭璧。芳馨襲蘭芷。勗力芸我  
田。前脩蹈遐軌。作古詩一篇。奉呈庶齋盛翁。暨諸士友。繼友作韻再作。  
未及錄呈。蒙庶齋洎諸友示予和章。而容川劉君所作與余再和。第二篇。  
梓字韻一聯。合若符契。迺重次前韻。用以贈劉。仍不改前句。以表志同道  
合之意云。廬阜抗靈嶽。磅礴奠江涘。豈伊宅列僊。多士亦爰止。士林擢  
孤秀。我我冠仙里。貽我英瓊瑤。藉以雙鴛綺。愧此樗櫟姿。跋彼橋與梓。堦  
麓唱斯和。合宮復諧徵。竒君如莫邪。鋒錐幾淬砥。積韞諒已久。賞音豈無  
士。老我歌遠遊。佩萑扈芬芷。方駕遵脩途。駢駢勿停軌。復次前韻。呈庶  
齋先生。伊昔汗漫遊。弭節江之涘。娥英阻靈覲。九疑徒仰止。超忽歲云  
邁。駕言返田里。被我夫容裳。含章粲如綺。亭亭南山桐。嶷嶷九山梓。爰伐

永  
大



清廟瑟。朱弦發宮徵。顧惟推鈍質。永言資礪砥。豈無青雲彥。眷茲黃髮士。贈我荆山玉。報以沅江芷。軼駕諒絕塵。邁驅尚同軌。病中偶讀韋蘇州。

歲日寄京師諸季端武等詩。因次其韻。卧病逾休告。偶遂清淨緣。幽懷

復坦坦。謝彼塵慮牽。憶昨擁朱幘。守邦江北壖。翼效鉛刀用。矧值強仕年。

上將布德澤。下以惠顛連。拙疾負宿心。孤節差可全。緬懷千載人。聊用善

自詮。故山足棲遲。解纓濯清泉。縹緲造物游。閱此歲序遷。孤鶴忽騰翥。軒

軒返芝田。無題。駑馬非龍媒。形如渥洼駒。眷戀棧豆恩。低首駕鼓車。

逸足思蕭雲。羈勒有所拘。豈無九方歎。相視空嗟吁。天廡十二閑。飽秣玉

山芻。立仗殊不鳴。矯矯真良圖。造物等嬉戲。孰賢復孰愚。浩歌撫秦缶。繞

屋聲嗚嗚。猗猗彼芳蘭。托根華池邊。婉孌結新婚。期若金石堅。金石信

不渝。婚嫁當及年。遙遙遠寄音。迢遞阻山川。望君君未來。芳歲宛徂遷。感

彼夫容華。灼灼艷且鮮。黃河出崑崙。九曲赴東海。知歷幾險艱。朝宗意

斯在。桓桓南山松。特立閱千載。枝柯鬱且茂。不爲歲寒改。世故饒變更。倚

伏難豫待。但秉金石心。茲生尚無悔。西州有寒士。結屋山之麓。鋤治五

畝園。但植梧與竹。汲井滋芳根。列援護真木。綠竹漸有實。梧桐陰始綠。鳳

兮渺何許。遲爾一來辱。雅意在千年。君心何太速。肅肅張兔宜。依依守

雄畢超然龍與鳳。世外保優逸。離群豈不若。自顧寡儔匹。白駒爲場苗。俯首就維繫。所以嚴子陵。不爲漢光屈。太公混漁釣。伊尹隱耕耨。一朝遇

真賞。歛起佐元后。世無九方臯。相馬失之瘦。昂昂千里駒。安肯戀棧豆。吾慕鄭子真。躬耕老巖岫。行行復行行。出門恣遊衍。溪邊散餘步。溪水清

且淺。魚鳥各從容。閑雲任舒卷。秋風柳嶺峴。歲寒松偃蹇。喜茲秋郊淨。樂我襟懷展。襟懷日以展。我心日以遠。安得同志人。共陟青雲巘。民彝物

則自天全。秦火炎空詎可燃。妙理生生誰會得。鳶飛魚躍塞坤乾。聖心原委寓遺經。先達重陳炳日星。暇食安居了無事。明窓棊几靜儀刑。道

匪虛無大路然。周程授受有心傳。可憐弄筆操觚者。抵死區區幾百年。山靜泉清全道體。草生木長驗人心。導洎護蘖兢兢意。何日清江映茂林。

琳宮盆沼貯清泠。七澤三湘照眼明。並蒂芙蓉藏艷冶。露盤雙玉共金莖。露盤雙玉共金莖。吸露仙人上碧冥。手把雙荷一揮灑。群生醉夢豁

然醒。絲絲寒雨霏空碧。一片清愁宛如織。候蟲抱恨復啾唧。萬里羈人嘆行役。雌蜺千丈橫晴秋。須臾倒影吞江流。葛衫無柰風颼颼。坐見暝色

來高樓。北平飛將老不侯。一言悟主田千秋。明發往問滄江鷗。咄哉痴計良悠悠。公擇藏書五老峯。貽謀燕翼垂無窮。眉山仙伯絕盛事。至今千



載流清風。雲孫磊落殊逸群。文雅彷彿如前人。牙籤插架三萬軸。天祿石渠不足吞。我生粗有劬學志。歲華荏苒嗟無似。有願須讀未見書。慚非海內無雙士。知君好事絕等倫。友朋就假寧憚勤。異篇隱帙倘垂示。微辭妙理當同聞。偶成。自笑山林麋鹿姿。世緣驅迫到京師。金張有籍通青瑣。嚴鄭無階上赤墀。擾擾紛紛亦良苦。熙熙壤壤竟何之。野鷗未是樊籠物。夜夜江湖入夢思。青雲冠蓋滿皇州。黃閣烏臺據上游。時事糾紛空嘆息。賞音寥闊愧淹留。公車辟掾求三語。逆旅哦詩擬四愁。翁媪倚門心政切。春風菽水去來休。古詩。幽人捐筋力。自斲十畝荒。手持蟠桃核。種之南山陽。一年萌蘖生。百年枝幹長。迺遷三千年。美實期見嘗。客從都邑來。衣馬多輝光。薜華欲分贈。朝露含幽香。笑我大遠計。悠悠何所望。

律詩

崑崙積石導洪河。銀漢曾通萬里槎。自厭簪裳汙臺閣。政宜樵牧

傍陵阿。鳳麟呈瑞吾何與。珠璧聯輝世豈多。玉署薇垣奏風雅。空拳深愧

敵操戈。絕句。來時梅萼衝寒破。歸去莪葵向日開。千古江山儼如畫。

不堪荒草沒燕臺。王惲秋澗集。冬日與呂文讀毛詩二十二首。婦道防

大永

閑貴有初。文姜失御從雲如。何殊筍敵梁空在。秋水誠多得計魚。敵苟。服御鮮明擬大君。麟麟駁擊汶陽春。載驅既匪勤王事。隱惡能無播萬民。

載駢 濟濟威儀美且都。詩人流詠入嗟吁。齊家為失防閑禮。禦亂無多  
金僕姑。倚嗟 為國規模以德將。恬然風俗入安疆。新婚服祿既非禮。葛

屨凌霜尤失常。葛屨 汾水悠悠宛一方。條桑采蕢僕夫當。誰知粲粲耗  
車子。終日傾筐沮洳傍。汾沮如 得民方可固邦基。此道幽深莫我知。却

憶賓庭陳百旅。棘桃猶足備多儀。園有桃 地狹民稠十畝間。來歸來逝  
共閑閑。何當一復周家制。各守封疆絕往還。十畝之間 邦畿蹙近四隣

侵。行役無時怨抑深。陟岵遐瞻私自慰。倚門應甚望雲心。陟岵 不畋安  
得獸懸門。匪稼胡為未積困。但恃鄙貪居祿位。不能無愧伐檀人。伐檀

碩鼠歌詩怨已成。三年貫汝未聊生。熙熙彼土雖云樂。猶抱遲遲去國情。  
碩鼠 皂綈示約人從化。玉樹歌淫國旋空。蟋蟀戒深垂萬世。由來奢儉

貴乎中。蟋蟀 隰原尚賴樞榆蔭。人主憂勤貴一身。堪鄙晉昭徒自苦。只  
將鍾鼓樂他人。山有樞 粼粼白石水揚揚。宗國由來日盛強。本末儻從

師服諫。爭交竊國似田常。揚之水 沃土分封自晉昭。子孫蕃衍喻園椒。  
大夫休起盈升歎。宗本顛披爾遠條。椒聊 束楚綢繆仰見星。時危婚嫁

禮難成。却思王季興岐日。內外俱無怨曠情。綢繆 骨肉凋零失所親。徒  
行踽踽一身存。不如杖杜春前樹。枝葉猶能庇本根。杖杜 服御羔裘豹

# 永

## 大



飾祛國人不愠反居居。豈無它所携持去。思好猶懷未忍疎。羔裘 孝養  
庭闈士乃常。反教執役事戎行。悠悠仰面蒼天渺。失所何殊鵠在桑。鵠羽

晉國流風屬變移。武公反正思依依。誰知問鼎傷肩際。肯獨尊王請命  
衣。無衣 道左團團杖杜春。清陰猶自庇行人。國疆須賴群賢輔。狐特何

為任一身。有杖之杜 歛生蔓野葛蒙枝。女子從人得所依。衾枕未溫征

役遠。庶幾百歲願全歸。葛生 晉獻聽讒似采苓。竟從微隱殺申生。後王

采察能明遠。諧想雖多事不行。采苓 偶書 唐到開元極盛年。見人說

侶即欣然。時時夢裏長安道。驢背詩成雪滿肩。郝卿持節使江臯。子勉

翱翔主部曹。我幸閉門無一事。醉餐秋菊讀離騷。人無定志何從好。事

到難量尚口行。一理縱能消百妄。物情其柰正逢迎。總題 無窮山轉

青龍峽。不盡溪蟠碧玉深。西自鎮江南抵福。三千里路略相同。題遺山

先生手書雜詩後。文鍵親承謦欬餘。又從珠壁見遺書。常疑落落江山

筆。不放奎光到玉除。雜詩 野人家具取宮中。適用都輸瓦缶功。君是

荆崑瑚璉璞。得來纔待費磨礪。較量暮四與朝三。初不多爭讓愧慚。戀

戀不成丹闕夢。劍南才了又湖南。夢歸故國蒼茫外。春老風沙慘淡中。

辛苦西臺臺下栢。不成還作柳花空。昨日清明塵障面。今朝上巳却晴

明老天氣候初無定。敢倚虛名作實行。人家構室要忻懽。小木枝撐易作功。汝是連雲棟。隆物得來才費梓。人工同。翰臣讀漳濱唱和詩軸。

草堂舊雨記相尋。細嚼漳濱唱和吟。白雪調高雖寡和。朱絃聲眇有遺音。犀寒蒼渚竒逾出。氣奪元胎理更深。一洗向來箏笛耳。坐聽三峽瀉瑤琴。

高山仰止爲千尋。更對佳人與細吟。藝絕六鈞俱破的。調高千古得知音。靜藏脫兔無窮變。法比滄溟不自深。客去灑然心境寂。滿軒秋氣入絲

琴。跋王內翰與木菴唱酬詩軸。木菴詩筆唐文暢。心印多從吏部傳。

豹管一窺連璧句。月牕慵展碧雲篇。風流豈落明昌後。真率當隨靖節肩。

留取人間作遺像。鬢絲禪榻話它年。程端禮畏齋集夜讀友人詩效歐公

贈沈博士體。陰風颯颯玄夜長。呼童秉燭坐中堂。手開薛子五月五日

書懷章。始言日月一去如箭忙。覽茲節物對酒不能嘗。終嘆負才蘊志不

得展。坐及顏衰鬢蒼蒼。詞深意氣兀碑讀之使我心徊徨。嗟乎薛夫子。爾

材誠高勿悲傷。是非由來兩茫茫。鳳凰在笄雞雉翔。玉石同糝一槩量。魯

大門九奏享爰居。西狩獲麟爲不祥。黔婁手足不自覆。闔閭金玉盈其藏。儀

衍得志稱丈夫。孔孟奔走終皇皇。嗟乎薛夫子。生得時道可行。坐俾君民

躋虞唐。不然飯蔬飲水枕曲肱。死爲善人稱其鄉。嗟乎薛夫子。古言貧乃



士之常。盜泉之水不止渴。惡木之陰寧爲涼。雪霜不大摯。松柏無由彰。爾不見靜清先生。宵蟠萬卷。富穰穰。志高太華狹土方。吐辭驚俗笑且僵。夏無完葛秋無糧。先生之操終巍昂。嗟乎薛夫子。爾胡爲使我百感集中腸。孤燈照壁。耿耿夜光。出門朝旭升扶桑。無題 不爲巢許不伊周。老向江

湖萬事休。脫下綠蓑伸脚卧。青山明月滿孤舟。劉仁本亦玄集漫成六首

涇水泥一斛。混流難清漪。硤硤非美璞。琬琢將安施。莊嶽置齊語。衆楚

爭咻之。獨醒不可活。何不啜糟醅。柄鑿舛方圓。展轉禍所催。出門涉遠道

柰此足力罷。仰天一長歎。我生胡不時。唐虞事揖讓。登庸八元凱。商周

德代虐。戰國干戈殆。項籍氣拔山。漢高力不逮。築城萬里長。亡秦乃胡亥。

邇來問鼎沸。四郊多仗鎧。天運尚有恒。人心殊未改。中夜起悲酸。冥號問

真宰。城頭烏夜啼。鄰鷄號嘖嘖。起坐不能寐。仰觀長太息。衆星何煌煌。

四繞環中極。銀河浪不生。旄頭泯無迹。天道垂耿耿。象緯森羅織。云胡海

宇間。干戈尚狼藉。真人坐法宮。明當驅鬼蜮。崑崙起西北。滄海亘東南。

洪纖有萬類。化育皆春涵。王霸迭興後。厥德胡乃慙。漢以龍翔起。秦爲虎

視眈。英雄橫割裂。民命已不堪。混一未百年。亂復如焚餒。文運苟恢拓。武

德何時戡。十載風塵起。四海亂縱橫。或圖私爵號。或叛據連城。或指敵

大永

王愾因之禍亂生。昨聞大兵馬。中原已削平。江南挈壺漿。日望王師迎。又聞到淮甸。會合出襄荊。應知稍足食。高秋氣肅清。渥洼產騏驎。溟渤生龍魚。豈是池中物。諒非轅下駒。風雷一鼓舞。天潢出雲衢。匪同枯涸鮒。垂頭服鹽車。蹄涔鄙蛙黽。阜樞陋駘騖。况逢伯樂顧。復值公子漁。天閑捧玉駕。玄極扶鰲樞。漫成絕憐海上覓神仙。童女童男采藥船。白日人間愁短景。朱顏暗裏換流年。蓬萊已見成清淺。陵谷何知又變遷。却笑五雲香案吏。陳辭再拜玉皇前。無題學仙贏得維摩病。凡骨慚非大藥姿。玉檢每從天上下。瑤笙誰向月中吹。陰陽煅煉成丹鼎。沆瀣光明洗肉芝。會見此身先羽翼。飈車有約赴安期。胡惟仁詩讀羽庭詩因成六十韻。委羽丹霞宅。弄珠明月宮。瑰文當瑞世。高步遂蜚空。政佐東藩治。情輸北闕忠。及觀憂國詠。深識贊皇風。吳越干戈際。乾坤翰墨中。春陵哀困悴。梁甫惜英雄。隄海歌良吏。田湖謹在公。體應追雅什。律可協臣工。城役傍周道。河防念禹功。厲能今尚梗。懷古意何窮。美刺麗以則。編摩初有終。詎云王迹熄。猶見政音通。次第開群作。英華萃厥躬。思深淪幻妙。氣合動冲澗。惺映夫容綠。階翻芍藥紅。想移清晝日。吟送碧霄鴻。鄉夢歸還託。天倫愛益隆。下言輝杖藜。上憶茂萱葢。唯諾尋常語。慈祥豈第充。誦其文藹藹。聽者

永  
大



識風。風綺繡紛相錯。波瀾迥不同。片言居警策。一字慎褒崇。開闔分江漢。  
低昂眇華嵩。歲蕤九苞鳳。俊逸五花驄。闕鍵環連鑠。鋒鉞劍在龕。寒欺冰  
井玉。清泣露盤銅。月映秋河桂。霜凝曉岸楓。鸞鈴鏘藻軾。鯨錦結雕櫳。姿  
媚何飄忽。襟期必混融。倅神殊變化。任物賦纖洪。間竊窺賢製。伊誰概鄙  
衷。頌聲荒蔓草。詞學擅雕蟲。徐庾波流靡。王楊燎焰烘。柏松羞晚節。桃李  
競春穠。秉筆歸豪傑。揚桴發賸聾。哇淫方襍奏。寥廓竟孤翀。黼黻宜王度。  
蕭韶合帝聰。一麾邠久外。五馬又從東。川瑩金浮景。山輝壁吐虹。薦章交  
館閣。脫藁播兒童。鳳沼才名重。鷄林紙價穹。內人傳樂府。使者致吟筒。化  
日行宣朗。卿雲覆鬱蔥。詔歸清禁直。衣染御香籠。仙苑嘲飛鷺。天閑詠雪  
驥。賜袍題獸錦。銘噐表彤弓。合是詞林虎。寧淹幙府戎。鋒車佇敷迫。璜珮  
聽琤瓏。小子惟狂簡。生涯任轉蓬。束書遊上國。沽酒醉新豐。荆棘長途暗。  
塵埃短褐蒙。投竿思老渭。彈鋏擬歸馮。杳杳迷方術。依依類瞽朦。八能慚  
賦說。一物咲倥侗。頗効鉛朱抹。難名繪畫攻。苦吟三逕菊。清掩半窻蓬。歛  
爾看千首。令人豁兩瞳。學鳩徒羨鶚。吟鹿敢當熊。鳴感車中鐸。材憐爨下  
桐。甄陶知有在。蜀郡賴文翁。李廷寓庵詩藁偶成。時往草木幽。事寂門  
巷閑。飛鳥來親人。故作可憐意。風雨蕭然一室虛。床頭惟有舊時書。官

永  
大

閑不理西曹事。自取芸香辟蠹魚。春色堂堂不必疑。浮雲流水任東西。  
曉來一陣催花雨。村北村南布穀啼。春色年年自往來。偶然行上妙高

臺。可憐荆棘參天裏。一朵桃花獨自開。五言四首。顏色不如前。舞袖  
無心著。寄語搗鼓人。莫搗紅芍藥。自舞不知羞。欲罷更垂手。今日看他人

乃知前日醜。對酒莫舞劍。坐上客欲起。爲有傷心人。如何要人喜。梨

園人散後。處處霓裳舞。惟有李龜年。逢人淚如雨。絕句。夢覺西齋鶴

影孤。最憐殘月掛高梧。一窻涼氣如清霧。起看菖蒲葉上珠。漫題。日暮

山光合。雨餘溪水清。可憐桃李樹。猶有故鄉情。溪水東流去。春愁可柰

何。美人今不見。門外落花多。無題。世事真難托。微宗只自憐。文章登

第日。淮楚用兵年。薄宦春雲外。歸心夕照邊。長安無近使。回首意茫然。

幽居無客至。倚杖問韶華。滿地生芳草。開窻見落花。衰年常畏酒。多病復

思家。獨立無聊賴。空牆散夕鴉。劉彥朴索月旦評詩。亂後人才久混

并誰能着眼向高明。汝南莫說先賢傳。陝右重新月旦評。妍醜固難逃水

鑑。重輕終不離權衡。却防暗裏曹瞞至。世上姦雄要指名。讀樂天詩

寒齋坐無事。閑觀樂天詩。一篇復一篇。終帙不知疲。撫卷想其人。百慮春

冰澌。便如飲醇酎。心體俱融怡。夫君古達者。聞道超希夷。曾中浩然氣。不

永  
大



爲富貴移。立朝著直節。終始無磷緇。窮通等一致。未見喜與悲。放浪林野間。自比榮落期。香出月明夜。洛水花開時。沉酣溺杯杓。諷詠多詩辭。襟懷旣夷曠。文字無嶽峙。雖言未嘗言。真是忘言師。人生能幾時。飄若風中絲。巧拙全一死。虛名亦奚爲。得酒且開顏。萬事姑置之。作詩不必工。醉墨徒淋漓。襪翻我自穩。任使俗人嗤。古詩涉渚采春蘭。蘭生不盈握。我欲持贈君。路遠安可托。昔者承君恩。良厚不爲薄。今君在萬里。音書兩冥寞。我憂君不知。我意君不察。蘭葉何青青。馨香隨風發。安得入君懷。爲君解煩結。悠悠終莫致。脉脉心不絕。髮衰日已白。形衰日已槁。誰於形髮間。不隨形髮老。浮雲日夕變。青山依舊好。此理非智求。不在讀書早。欲看杜陵花。須上長安道。娟娟圓月明。照見我心懷。明月豈不美。我懷自不佳。黃河決金堤。東南流入淮。誰令州與縣。化爲狼與豺。人命賤如土。委棄不得埋。憂來望中霄。北斗當空排。攙搶不可視。默默下西階。農家初闢地。日夕把犁鋤。荆棘揔芟刈。新苗漸成區。勤勞不自怠。瘠土爲膏腴。惜彼後來人。不念前人劬。耕耘付童稚。倉廩隨時虛。遂令禾黍場。化爲榛與蕪。昔以一人耕。成此百畝居。如何有百畝。不能養其軀。牛犢辭故舍。華屋爲丘墟。牧豎不忍視。落日空躊躇。蘆葉何挺挺。稻葉何垂垂。至寶不外眩。高

永  
大

才恒自卑。羸生白首狂。窳子扣角悲。膏中有所負。何必常人知。念彼輕薄兒。衣冠空陸離。氣隨黃金盡。皇皇竟何之。古來觀人者。不輕微賤時。早起坐東軒。晨風吹我衣。初日出海上。蒼涼無赫輝。翳翳新木榮。交交群鳥飛。禾黍蔽原野。秋實已離離。雖非已所植。私欣雨暘時。亂離得安處。貧賤何足悲。上山行採薪。下山行採蘭。採薪易粟歸。採蘭棄草間。雖有君子心。不如桃李顏。方知出山賤。不如長在山。我欲遺所思。路遠風雨寒。嗟哉不能顧。俯之淚汎瀾。道傍華表柱。下有百年墓。不知何代孫。伐賣墳前樹。伐樹尚可忍。畏官留禁步。棄地與他人。遺骸一朝露。薄葬古所敷。雖貧反能固。堂前兩株樹。朱夏結層陰。相看坐終日。愛此歲寒心。故人離亂間。寄我孤桐琴。不辭涉遠道。以我為知音。登山覺山高。汲井知井深。不經洪爐燃。不識真黃金。丈夫同患難。方知尺與尋。傷彼市廛人。滄滄安足諶。荷花未出水。荷葉已田田。何不飄流去。中有藕絲牽。荷葉牽藕絲。欲去不得去。客子萬里行。棲遲在中路。豈無田與廬。豈無親與故。丈夫既出門。雖親弗能顧。去為人所憐。歸為人所慕。安能隨燕雀。低飛度朝暮。媯媯秋風起。撼撼庭樹鳴。浮雲有涼意。白日東西行。路有羈旅人。自言久徂征。去年役交河。今年戍彭城。上功在幕府。官職未分明。長鎗不得用。黃金有

永  
大典



餘榮荆棘被原野。流水不復清。無官亦歸去。天下何時平。遊子念故里。日夕心懸懸。微軀下自保。遠道何當旋。援琴欲撫之。一撫兩絕絃。蒼天一何高。海水一何深。山高與水深。不如游子心。安得雙羽翰。歸飛投故林。婉婉良家子。娟娟好顏色。芳年不自愛。誤爲鄰里識。一朝入漢宮。引過長秋側。雖然不得憐。名在宮人籍。已矣復何言。芳菲從此畢。蘼蕪生水濱。綠葉何委蛇。間以蘭與芷。被彼清江湄。清江起洪流。化爲濁水泥。憔悴勿復道。飄零渺難期。所願蘼蕪草。微根當自持。浩浩天地間。二氣相推移。流行不暫息。生物迺其宜。天地不生物。用此將安施。斯人七尺軀。不與衆物齊。聰明百骸具。豈但食與衣。晨興暨夕息。凜然當自持。被髮晞朝陽。棲遲陟行路。春風吹百草。歲月忽已暮。客從海上來。潔白如秋露。吹笙駕玄鶴。縹渺雲中度。教我服華池。令我顏色固。童子十二三。汲水西澗阿。水深不可汲。白石生清波。俯首濯雙足。旣行亦旣歌。上山采紫芝。下山牽綠蘿。手持一尺箠。捷若猿猱過。恐是黃初平。驅羊下前坡。我欲往詢之。奈此頑劣何。幽幽山中寺。釋子二三人。晨興擊鍾鼓。誼誼誦靈文。齊罷各分散。寂然無所聞。或坐長松間。或行清澗濱。采花獻佛前。不喜亦不嗔。山頭日未出。有客來扣門。自云西州士。牧牛三十春。問之無可言。長歌下青

永  
大

雲晨起坐西齋。群峯淨如寫。初陽上其巔。白雲在其下。復有丹碧林。闌  
斑綴原野。微風披拂之。庭戶亦瀟灑。優游得清詵。顧我何如者。夢幻既非  
真。榮枯諒成假。諸緣隨所遇。悠然坐蘭若。亭亭長松樹。白雲護其巔。飛  
鳥不敢下。伏苓已千年。蒼鼠從何來。便捷不可言。倏忽在其後。倏忽在其  
前。睚眦利指爪。枝葉無由全。念彼歲寒姿。受此微物牽。驅之不得去。撫之  
徒自憐。丞相出午門。大夫已來迎。兄弟同一家。無相猶以爭。豈曰無他  
人。雖賢不如親。晨出與暮歸。以保我弟昆。劉文簡公集口號 竹外花連  
屋。溪邊柳映門。看山無俗客。邀月有芳樽。雜書十首 雷兼電擊威何  
壯。雨挾風來氣更豪。坐待紅雲晚晴後。靜聽蛙吹起城壕。雨後蟬聲特  
地聞。自諧宮徵和南薰。千門萬戶垂楊裏。無限清陰總屬君。階下茂葵  
開已過。稀稀枝葉不成叢。晚花三兩看時見。也自芳心向日紅。樹頭蛛  
網車輪大。遮得蚊蠅已數回。可笑無心蝴蝶子。邊傍飛去復飛來。溶溶  
野水淡雙鷗。閑煞夕陽影外秋。忽見沙邊有人立。貼雲飛去不回頭。兩  
燕累泥居屋底。群雀穿穴巢屋顛。昨宵雨自雀巢入。燕室墮床人不眠。  
雨勢未知幾日止。不計屋漏怕敵傾。當門巨蚓長一尺。時與井蛇相亂行。  
今晨好晴氣不濕。家家箱帙滿庭中。當天赤日照如火。群蠹鑠滅須臾

永  
大



紅。北堂玉簪開未開。容鬢昨夜涼風來。佇目東南一千里。白雲終日只  
裴回。有感全前月。貧家男長憂娶婦。富家女長不出戶。貧富相傾理

或然。男女失時更可怜。六言二首。經營郭外二頃。棲息城中一菴。莊

叟能知魚樂。宋宗嘗與鷄談。細看堯典舜典。熟誦周南召南。管甚東塗西

抹。從渠莫四朝三。天上人間華屋。水邊物外茅菴。須知豪客歌吹。不似

儒生笑談。好是拈紅拾綠。爭教看北成南。黃塵萬事紛擾。青眼吾儕二三。

外兄魏鵬舉以大銀詩一篇見示。仍令僕亦賦之。及云仰龜新題亦宜

致思。輒成古風一章以荅之。魏公卓犖真好奇。英才落落惟耽詩。偶觀

物象動佳興。行吟坐詠還如癡。揮毫一賦不容改。自然如匪用意為。連篇

累題出新險。燦然相映金玉輝。辭明理當愜人意。傳寫相告誰敢非。近來

變例賦大銀。全篇語意新尤新。恰如驪珠出滄海。照耀世目無纖塵。少陵

謫仙所未有。欲誦直恐驚倒人。寒齋書生苦多病。杜門不出聊養性。朝吟

才思還廢井。硯池生塵筆常凍。有時開卷能自娛。却得終朝對賢聖。偶看

君詩心茫然。搔首徒能發孤詠。作意欲效西施顰。跛足莫逐霜翻勁。新題

故賜安敢為。更待宗工示龜鏡。醉中聽智仲敬誦詩。喜而有作。眉厖  
齒白歡頰紅。足盤脅聳肩角隆。兩手捉膝氣吐虹。目睨屋梁頂摩空。攫如

寒鵲望四野。突若驚鷹超絕峰。須臾問口水湧風。瀾翻欲與長河東。誰知  
乾坤萬古恠。特氣泄此方寸飢寒宵。初為漢祖大風起。次擬荆卿別易水。  
邈然古意動悲壯。慘淡風雲酒罇裏。忽吟結客少年場。吳鉤錦帶照座光。  
恩讎生死一語頃。凜髮直上鬚髯張。復為廊廟賡歌曲。上有明明下穆穆。  
民無夭札物無疵。四海一家均五福。斂情却作行路難。長鯨翻海虎滿山。  
李白悲歌阮生哭。弊車羸馬愁長安。酒闌日落風色黑。寒燈耿耿月掛壁。  
微吟轉入楚騷城。切切門前山鬼泣。客飲不醉慘不歡。我獨起舞叫且譴。  
文章大是寫心具。如君氣象砭砭誰能攀。古人已矣不可望。一笑逢君千  
載上。劉將孫養吾集約畧雜詩 楚水浩浩白。楚山悠悠青。人生自失路。  
山水初何情。重華入愁雲。開闔環我纓。快然各千載。笑汝空一生。長風渺  
湘波。汝屈何由平。興衰晝夜事。反覆今昔同。可憐仁人心。忍死不忍從。  
明知力不及。誰遣身適逢。販鬻有竒利。守方無駿功。一餓西山西。一霸東  
海東。人生無智愚。用舍隨其向。儻能采葑菲。往往見所長。當其未必意。  
百計無一望。因依豈非命。遇合如有相。張良本為韓。陳平亦事項。才難  
聖所嘆。千百不一全。能言未易得。况復可繼傳。大官老於事。肉食偷目前。  
方當竊光寵。肯顧擇後賢。絳灌第一語。老死賈少年。事主敢不忠。忠乃

永  
大典



特未易。指軀欲奚爲。中道咄非意。是非或有局。忠邪亦易位。一時容異見。千古尚倒置。嗚呼東市車。此豈晁家事。大厦亦旣顛。一木何能扶。况乃非棟梁。曾不比樁樑。彼皆無責備。此獨有遺誅。公卿置何地。文字累老儒。寂寞楊子雲。見稱莽大夫。小兒必解事。老父何足記。頃時床下拜。終古眼中媿。新交陰郭家。平視壽張氏。風生臺閣上。寵列諸王次。固宜伏波翁。歲晚困帝媚。人或恃故素。安可知平時。誓忠益一語。成嗔癡布衣。忽逢青雲友。舊意更先疑。子陵作故態。鼎足無益辭。狂奴固當爾。君房殊可兒。狂俠世共喜。事敗有餘德。咄哉皆惡子。坐致人死力。風塵豈純臣。飢虎傳健翼。君看刳昏者。此豈嘗失職。時平一偷兒。世亂兩漢賊。俗下未易居。浮沉不可諧。諛之爲見玩。嘿謂我不濟。但平或可刳。好語猶亂階。不能皆達人。誰當怨中懷。德操尚可事。逢人好復佳。百年未易料。何往非失身。功名固震世。亦復多誤人。中道失知己。小兒共經綸。十年出師表。磊磊悲如新。一咲孝正語。此豈高光倫。勲業各有天。才智竟無與。伯符志不遂。公瑾年忽暮。高臺銅雀春。黃屋臺城路。赤壁固依然。江東兩坏土。二橋幸遇君。君亦二橋誤。英雄有惑志。百鍊居然柔。驅馳一世倦。歷落身後愁。遺言教賣履。想見訣涕流。美人內隱笑。世子外回眸。何待伏魄時。已忘

大永

西陵丘。大緩人所。有小靳非人情。乘危作險語。何能不疑。嗔君心人豈知。君語非所陳。造然豈友道。餘悔不蔽身。暮年王茂弘。流涕周伯仁。遂非何不至。中媿鮮自道。誰能當末路。未肯忘始好。初心盛德事。日暮行顛倒。古人有風致。語竟見懷抱。處中慟伯仁。桓公念阿浩。名輩不可高。同流何濁清。名猶天所忌。况乃自立名。邂逅有相逢。恩怨不自明。虛裁了何益。實患安可嬰。平生度元規。晚拜陶士行。士貧患無主。事主欲親已。親猶恨不密。密獲全者幾。奸雄志負國。疑忌及妻子。此猶凜不保。爾乃何足恃。吐茵岌殆哉。窺牘噫死矣。少年輕前輩。新貴喜失序。虛名隨位起。流俗浪交許。英賢意寥落。鼠子成乳虎。歲寒何足較。人事亦多故。向來王逸少。坐愧小懷祖。山河向寂寂。喬木嗟久衰。雲間昔汜濫。洛下相娛嬉。朝

遊王和同。莫宿劉樂隨。身猶先一輩。事已被一時。低徊渡江來。乃識蔡充兒。人生有邂逅。所托非所願。物論極無情。心迹誰與辨。噫嘻落帽狂。豈有入幕戀。髯叅與短薄。談笑入文獻。益嘉盛德人。老讀桓晚傳。六合方大內。意賞各一尚。朱門玩海鷗。故覺神氣王。高屐遊塵間。談辨雄坐上。或云古無有。彼道焉得放。不見元嘉間。嘗有黑衣相。六姓更逐鹿。南北沸問鼎。熾然驢九錫。紛若夢一頃。何者非奕棋。乃有愧未泯。姪嘲子廬墓。史



誚士不遜。如何千年齒。獨笑彥回冷。晉陽家化國。首事子推父。擒充又  
戮竇。平杲遂誅武。東宮漫長嫡。統業誰基緒。縱無玄武門。可但天策府。頗  
笑魏。鄭公歡。取萬餘虜。數緯聖不道。機讖吁何祥。所徵輒亂萌。蚤覺幽  
豫防。如何比造命。拱手待成殃。英明有時昏。衽席養戈斨。但疑女君羨。皇  
識武媚娘。古今有大笑。枯楊晚華出。嫦娥齒髮落。未肯沮擇匹。墮身奉  
君愛。身亦竟狼籍。彼淫固自取。渠命豈不惜。蓮花張六郎。老武八十一。  
語言誰不美。肝肺鮮如流。貫高對滕公。令伯念母劉。十年真寥寥。情語罕  
其儔。靈武黃瓜辭。蓬萊家事謀。吾評唐名相。三歎李鄴侯。知士明觀火。  
仁人心持衡。官闈禍東都。以權不以兵。大歷衰失馭。神策監專征。任文固  
姦朋。易置亦忠君。崛彊昌黎公。曷賦永貞行。論勢不論理。盜或非所憎。  
苟安不慮遠。事有願因循。涓涓既成河。滔滔愈無津。固知多荆棘。長此待  
何人。不曉白樂天。風諫平藩鎮。官海古風波。高位危竿伎。况復問亂離。  
安所盡命義。一朝姓七八。忽起年三四。富貴不掩身。瞬息無噍類。漫今馮  
瀛王。得證佛地位。淵明節高世。甲子書微茫。子美窮念君。同谷歌悲傷。  
可憐天復末。羈紲圍困場。故官署庾子。事苦無名章。得非韓致光。坐累香  
奩香。杜平閑日與青山。睹詩各得數解。簷陰緩轉厭呼茶。手倦團綃

永樂大典

大瀛王得證佛地位

淵明節高世甲子書微茫子美窮念君同谷歌悲傷

坐半斜。忽聽一哇鳴草際。呼童着屐探荷花。綠陰啼鳥不知名。午睡醒來獨自行。山下行人應羨我。誰知愁是此中生。飛鳥帶將梅子落。癡蟲

打得紙窻聲。莫嫌獨坐愁如海。滿眼新詩拾得成。竹林風定日流金。人似遊魚抱釜鬻。道是無情如有意。時時一霎故輕雲。日長談倦厭拈棊。

怕惹閑愁嬾賦詩。忽憶故人天外去。綠陰濃處立多時。莫將幽夢攪天涯。玊簟涼厨鎖碧紗。自愛竹床跌坐久。起來蒼葛已開花。謾題力屈

塗窮定某州。如今草莽是何丘。已傷無哭田橫處。乃有追評葛亮謀。劍氣圓寥狐拜斗。龍光變滅蜃成樓。逢人不忍重相問。時倚空庭淚洒楸。穹

穹厚厚此含人。零落纍魂托斷雲。萬里忠精託高廟。一函枯腊從先君。越吟已復江南些。漢土終無海外墳。故舊盡哀知有處。西州鞭語不堪聞。豫

章熊朋來集奉還皮魯贍北遊詩。桃花入賦長孫枝。虎豹傳斑繼子皮。衰朽無因出門去。感君示我北遊詩。紫極道士葆藏蕭水屋。親寫送伊

祖師。任浮雲詩。因次韻。寫韻簷楹瀕水村。西南其戶正臨坤。莫談李洞浮雲觀。愁見桃花今日門。厓客何期詩閱世。羽人已。有子傳孫。此山恨欠

涪翁句。讓與尋陽龜殼軒。趙閑閑醉寫陶詩三首。卷末云。元光元年冬。寫詩鬚雷在傍大笑。雷蓋渾源公。希顏也。按元光癸未。當宋嘉定十六年。

大



九月庚子朔食既。明年宋寧金宣俱登遐。又十二年而金亡。開闢醉寫  
淵明詩。髯雷大笑成歡。是年戈鼓季秋朔。明年元光無光輝。癸未三月

那德自金奔宋。言金改元。犯漢舊。皆笑曰。非元光乃無光矣。一星未周世

運去。酌酒匆匆風景非。義帝死。圍城中。酌奠未畢而城陷。伐有興亡何處

避。呼精金虎御天機。道藏經周宣王時。聞空中歌云。金虎入門呼。長精吸

重泉。柱下史曰。言太白入昴畢。戎將有此。乃棄官隱去。可憐士生遇此際。

不有淵明吾誰歸。結廬豈免在人境。閱世從知與我違。安得梅源遍平地。

不惜草露長沾衣。陶詩趙墨那忍讀。倚瑟再疊西山薇。馬虛中霞外集奉

酬泰軒蔣明府惠詩集。六義陳國風。篇章著三百。齊梁變浮靡。雅道日

崩迫。大曆拯頽波。雄鳴破昏惑。有如赤水珠。妙在心自得。泰軒儒門老。赤

手探月窟。折得芳桂枝。月姊不敢惜。吞香入肺腑。出語固超特。夜久虛室

靜。淡淡月光白。一讀回古心。再讀動精魄。乃知天地間。元氣運不息。高松

挺節操。衆卉失顏色。小子愧學詩。應當取其則。偶成。松風寄一龕。蕭

瑟我相諳。雲海鷗盟冷。名場蟻戰酣。履須經實地。道豈事虛談。世態從欺

老。欣欣雪滿簪。昔嫌上界多官府。不道人間足是非。四十年來悲喜夢。

倚闌閒看柳花飛。黼黻青黃入眼迷。升沉人事理還齊。曾看知北嘗論

大永

蟻不是巴西錯放麩。百種時情雲擾擾。一場春夢草萋萋。此心肯與南風競。已向蒙莊悟木鷄。雨奇晴好慣相諳。欲寫天然下筆難。畫舫人歸歌舞散。老夫獨自倚樓看。善政猶如草上風。聖賢法則豈無同。失時謾使嗟陽虎。迷古誰能祖鬻熊。治亂班班方冊裏。江山歷歷畫圖中。百年多少浮沉事。不及槎頭把釣翁。穀雨聲連四月初。閑門甌石久無儲。貧伶杜甫常賒酒。老愛邊韶懶讀書。鄉里小兒相爾汝。簷楹乳雀自親踈。生生化化趨春意。誰羨簞瓢樂有餘。讀石田詩有感。吟看三數過。不覺燼寒燈。意趣無非道。交游半是僧。課書貧自樂。媚竈夢何曾。自後言詩輩。苦心終未能。雕搜還不到。姚賈是宗風。勢立典刑上。句存規矩中。片雲孤嶼遠。寒水夕陽紅。此理言難會。冥心感化工。悟門難槩入。轉讀轉堪傷。天地因經緯。風騷張紀綱。高秋明素髮。老菊傲繁霜。物化精神在。心中何亡。無題。華轂高軒傲世塵。一枝筇竹喜相親。精神我愧鴻都客。甲子誰同絳縣人。悠遠山川終古在。鮮妍花草逐時新。故交霜葉凋零盡。欲話當年記不真。戲衫碌碌戀癡人。傀儡棚前錯認真。事去謾勞添註脚。愁來悔不早抽身。濠魚未解莊生樂。社鼠寧知晏子嗔。桃李無心自開謝。可堪春色太逡巡。輕肥裘馬我無能。糲食簷衣寄此生。游淡每懷黃叔度。

永  
大

誰同絳縣人

悠遠山川終古在

鮮妍花草逐時新

故交霜葉凋零盡

欲話當年記不真

戲衫碌碌戀癡人

傀儡棚前錯認真

事去謾勞添註脚

愁來悔不早抽身

濠魚未解莊生樂

社鼠寧知晏子嗔

桃李無心自開謝

可堪春色太逡巡

輕肥裘馬我無能

糲食簷衣寄此生

游淡每懷黃叔度



巧言休恥左丘明。經天日月分遲速。行地江河自縮盈。大道甚夷民好徑。  
等閑貧富不須驚。堪憐堪嘆苦耽吟。吟苦何堪造物嗔。容陋影慚窺井  
母時來功立。貶繪人長鏡短。褐秋云晚。白髮青燈迹已陳。只有西山無限  
好。暮雲歸鳥自情親。讀唐僧詩。高僧吟興苦。吹萬各秋聲。着物鬼難  
測。爲容人盡驚。力回千古意。氣逼五言城。輸與無心者。輕輕道得成。詩  
思。本與名言絕。乾坤鍾氣清。靜中收拾得。閒裏琢磨成。美刺明時化。幽  
微索至精。不曾親悟入。似隔萬重城。毛詩。六義關風教。吟須字字安。  
苦心雕琢易。出口渾成難。道合天心動。篇終鬼膽寒。極玄言不得。休作等  
閒看。謾成。暖催花雨濕行塵。脉脉憑軒欲損神。閒憶少年如昨日。只  
疑樂事是前身。黃鸝紫燕春仍好。剝水殘山物自新。可惜白鷗波浩蕩。扁  
舟老却釣魚人。林間把酒山鷄舞。竹外支筇野鶴隨。醉卧落花春不管。  
醒來惟有白雲知。松風滿屋散輕濤。老圃無心事桔槔。曝背簷前趁斜  
日。怒爭梨栗笑兒曹。徑曲交加鎖竹陰。不教寵辱到林扃。心閒莫道渾  
無事。粉落松花汗鶴翎。參天楊柳手親栽。一院西風戶牖開。落日尚餘  
三四尺。山平水遠看秋來。區區得失付酣歌。誰信簞瓢得意多。荒徑久  
無桃李樹。不知春事已如何。遠籬綠橘間黃橙。籬外青山取次橫。一陣

永  
大

晚風寒霧斂。堦前待得月明生。九日籬根菊未黃。無詩無酒惱秋光。偶  
思巢燕歸飛盡。自理枯蒲葺草堂。溪鱖初肥濁酒香。村南村北稻登場。

白頭羨殺田翁樂。醉向茅簷卧夕陽。小春天氣未生寒。綴樹朱櫟正入

看。昨夜海棠開數朵。一雙蝴蝶上闌干。新霜尚薄樹聲乾。寒水無痕倒

浸山。知是釣船歸較晚。鷓鴣嚶嚶起蘆灣。飽霜紫芋細凝酥。旋撥寒灰

出地爐。慚愧鄰家新酒熟。客來沽得滿葫蘆。野花芳草三春夢。楚水吳

山兩地愁。心緒晚來禁不得。半身斜日倚江樓。曾向山中靜結廬。雲邊

煮藥自樵蘇。不知白鶴巢松樹。占得門前第幾株。世態爭趨向背機。眼

看朱碧旋成非。山桃野杏春猶淺。早有青蟲化蝶飛。蕭蕭野老髮垂肩。

家住湖西杜若煙。載得芟根入城賣。西風落日滿歸舡。草木淒涼露未

晞。秋蟲瑟瑟漸聲底。竹窻夢覺湖光白。月在鄰家釣艇西。風琴流響韻

虛堂。湘簟歌眠水一方。靜裏數聲碁剝琢。乳鶯深向綠陰藏。眼底紛紛

五色迷。楚人元不重山雞。老夫驚覺槐陰夢。悟得南華物理齊。槐柳交

大陰日正長。荷花荷葉滿回塘。人間未必渾無暑。心地清涼暑自忘。老圃

秋光亦可佳。淡煙涼日自生涯。儘容詩酒酬清事。丹桂纔開第二花。珠  
絡楂橙滿閣垂。欣欣節物暖爐時。膽瓶小巧偏堪愛。挿得檀梅一兩枝。



長憶成人總角年。學吟終夜不成眠。精神消盡今頭白。祇得詩名不用錢。  
夜雨膏濃曉又晴。熙熙景物象升平。啼鴛只在花開處。誰識桑中布穀  
情。槐陰滿院喧巢鴉。蜜房香老蜂趁衙。鄰家艇子釣魚去。水光搖動金  
蓮花。移榻松陰避月明。天河萬里度流星。仙遊夢覺蒼華冷。猶聽鶴聲  
來杳冥。西風吹雨十分涼。店舍新菊拍甕香。淨洗瓦盆剛菊本。老夫作  
意做重陽。老我何堪樂自全。不將造物強枯槁。貪眠又過希夷子。一夢  
人間七十年。枯蒲風急駭栖禽。紙帳燈昏坐擁衾。門外霜華如練白。不  
知何處尚鳴砧。飯罷迴廊轉數遭。不知積雪重林梢。自憐迂僻人多笑。  
洗竹交加助鶴巢。勝景園西石路平。瘦筇扶我過南屏。希夷名在庵何  
在。應是先生睡不醒。北風小雨戒新寒。隔水楓林葉已丹。莫道閑門知  
已少。白鷗飛去又飛還。隱隱寒燈竹院深。暗風吹雪打窻聲。利名不入  
蒲團夢。一衲蒙頭坐到明。斜陽日日過山坳。鍾磬相聞隔水敲。生事一  
盂饘粥外。靜看林下鵲爭巢。燕山楚水曾爲客。慣聽霜砧搗月明。不似  
新愁怕新鴈。秋風吹落兩三聲。晴日穿花暖似烘。風簷微動玉丁東。山  
童睡起心無事。斫得筇枝補鶴籠。岸柳禁風葉漸疎。乍涼還試夾衣初。  
雨添秋水入籬落。閑看鷺鷥行捕魚。酒能醉客心難醉。詩解窮人思不

窮千古湖山百年事。倚闌分付落花風。芙蓉露濕天宇清。星河淡淡蟾蜍明。西村知有夜船過。撩亂一群鸚鵡鳴。雲歸雨歇湖水平。五色蠅螬

山邊明。唱歌舟子採菱去。十里柳堤蟬亂鳴。煙水微茫沒釣磯。物情人事兩依依。楊花自逐東風去。空見漁舟日暮歸。送客河橋愴別懷。露花

煙草見船開。傷心不及梁間燕。又逐春風冒雨來。西鄰張樂通宵飲。野老耽吟盡日詩。總在天機流轉裏。可憐樂處不相知。耶律鑄雙溪醉隱集

目題詩卷。下字工夫大。協音格律深。不唯穿月脇。當合出天心。莫街編苦疾。尚知織錦遲。篇篇何警策。字字更清奇。傲古。猗猗無粒粟。西

成收不得。供盡天地間。千年萬年食。鬱鬱無影樹。無人得攀折。障盡天地間。千年萬年熟。戲題近日所作詩卷末。誰擅風騷上將壇。頓還舊

觀據吟鞍。自然倚伏行藏在。未要閑人作話端。擬古。水涵春色柳涵煙。半是人間半是仙。簾底東風吹夢斷。一牕花影月明天。門外西風斷

續歌。曉聞行李過滹沱。得封侯也知何日。人道仙郎鬢已皤。沈沈鴈影落雲邊。雲邊鴈影橫秋天。秋天一望萬里沙。行人猶聽鳴悲茄。悲茄一聲

悲欲絕。雪紛紛兮風烈烈。玉泉溪上多舊遊。舊遊別後經幾秋。和林城西看春柳。何如談笑傾杯酒。百年身世一夢中。夕陽相對空回首。和延年



所誦小詩。月滿風簾醉夢殘。松陰滾碎玉欄干。如何又是沈沈夜。特比尋常分外寒。載賡趙虎巖詩韻。羅列征鴻字不如。天涯牢落正幽居。

故人何處秋光老。愁把蠻牋草草書。人生能得幾清明。得亦爲榮失亦榮。爭後便誇饒勝事。五湖煙景有誰爭。偶得鴈時遊子不禁愁。把酒

悲歌醉即休。旌枕夢迴情味惡。蒲天風雨五更秋。舟中讀仙伯詩歌

金門羽客傳仙伯。雕章繼賀登瀛客。錦囊滿積驪龍珠。冥搜得自蛟龍宅。

豈無神物爲護持。未許塵凡探幽蹟。金山萬丈安可升。玉海千尋不可測。

遂被聲歌歌一曲。四望煙霞皆改色。浪花遙逐清風來。容與舟容舟舟名

也。橫玉溪側。凌波弭楫水仙府。獨上蘭洲登醉白。馳情何許望成連。水與

青天等寬窄。張西岩集劉靜逸索詩。靜則不動體。逸乃不勞理。何以見

不動。月墮寒潭底。何以見不勞。雲歸故山裏。欲求二者功。且且反諸已。

讀陳節齋詩刻。心遠亭高樹拂雲。繡衣一去幾經春。壁間好護題詩石。

再見如公有幾人。不見當年老節齋。傷心遺蹟半蒼苔。讀餘風起庭前

樹猶似英靈到此來。方塘頗倦以此壯之。纔渡清溪懶着鞭。白雲嶺

上莫留連。與君馳下坡陀去。一簇人家是玉泉。三月晦日。雪帽風裘

出帝京。與春同到濟南城。明朝春又堂堂去。剝約飛花與送行。日長人

出帝京。與春同到濟南城。明朝春又堂堂去。剝約飛花與送行。日長人

寂簿書稀。擬賦春歸第二詩。可是東風尚纖巧。亂飄飛絮冒游絲。選杜  
緱山詩。緱山人去已多時。獨對遺編動所思。墳上不澆千日酒。世間空

愛七言詩。追隨工部仍多感。摸擬樊川更好奇。昨夜燈前選佳句。疾風應  
報九原知。曹杜聲名已並馳。楊王蹤跡久相隨。千篇雖富少青眼。一字

未安空白髭。得法初從緱嶺學。命題多是相州詩。可憐十五年前死。不見  
中原混一時。和張秋山壽詩韻。今年此夕倍光輝。新得秋山七字詩。

滄水傳來仍有派。寓齋仙去更無師。清如映月梅花朵。老似經霜檜樹枝。  
忙著錦囊收拾起。他時不獨說吾磁。安仁簿吳帝弼以詩求跋。燕都諸

公。送行詩既題其後。復用來韻。都城桂玉不關心。日日長吟復短吟。冷  
地誰逢人薦譽。清朝半是子知音。一封黃紙中書牒。八品青衫主簿箴。五

老峯頭舊遊處。停舟為我一登臨。張子淵集上京紀行詩。世祖龍飛奠  
兩圻。歲時延蹕重依違。千官扈從趨黃屋。三子聯鑣總白衣。眼底關山生

藻思。馬頭楮穎發光輝。詩成京國爭傳誦。太史遙瞻動少微。晚成。久  
大旱妨農稼。雲霓暝不開。強風秋愈壯。好雨夜深來。元帥嘉猷闕。官軍荷鎧

回。已虞儲待匱。川陸轉悠哉。元朝風雅擬古四首。涉江采夫容。江水何  
澄鮮。朱華映朝旭。窈窕薰風前。相望不盈咫。風波良獨艱。攬之置懷袖。撫



玩空長歎。春榮衆所慕。泯默無復言。益冬寒氣至。眇彼庭中樹。忽得故人書。中有相思句。故人隔異縣。相望良獨苦。候蟲鳴廣除。落葉被衢路。淒其對搖落。登高詎能賦。白髮生鏡中。荏苒流年度。故人歲寒姿。亦有濟勝具。相期佩飛霞。共飲金莖露。青青河畔草。春至不復腓。延緣被陂坂。飽彼牛羊飢。荏苒時序遷。王孫終未歸。西風一蕭瑟。楚客空傷悲。安知壯士心。金石乃不移。陰陽無停運。垂柳生金絲。鳥鳴百花開。迴首乃爾爲。丈夫貴自勛。千載以爲期。明月皎夜光。出自河漢東。衆星爛以繁。牽牛正當中。永懷乘槎人。上與河源通。遡遊往從之。杳杳將安窮。至人凌倒影。千載幸一逢。願言攬其袂。一洗塵埃空。乘風遊汗漫。歷歷天九重。有志未能就。憂心徒忡忡。絕句 磯頭繫漁艇。林下訪樵牧。炯然一白鷗。獨有蒲潭綠。獨酌玩溪水。溪水清且漪。山月忽飛來。皎然誰與期。酒醒悅山桂。流泉夜彈箏。獨上青峯去。中天見月明。坦坦黃金道。蛾眉七珰車。莫隨雙燕子。容易落人家。無爲人所憐。前有億萬年。後有億萬年。寓形此穹壤。百歲指一彈。古來多少人。滅沒已不聞。草木與同腐。可憐生世間。獨有聖與賢。明名長久存。聖賢在世時。小心常畏天。終始履周道。沒身無過言。所居至廣大。靡物可與權。萬衆不爲泰。一瓢亦自尊。我當師聖賢。無爲

永  
大

人所憐。古意美人插新花。恨不逐時好。花亦解自憐。紅顏易成老。

偶題 修竹千竿萬卷書。水明沙淨稱幽居。春風架上吹殘簡。時復晴窗

落蠹魚。永夜觀兒課舊編。小窗燈火憶當年。曲肱自笑不成寐。月上瑤

琴第五絃。雪夜題書玉署深。思山便欲寄瑤琴。征鴻若問平安信。河漢

東流是此心。絕句 繡簾鈎月夜生涼。花霧霏霏入畫堂。吹徹玉簫人

未寢。更添新火試沉香。金吾列侍擁旌旄。五色雲深雉尾高。視草詞臣

方退食。內官傳勅賜櫻桃。出門何路覓亡羊。日日紅塵枉了忙。笑殺東

齊趙夫子。不來看菊過重陽。無題 自古功名孰盡酬。平時閭巷詫封

侯。萬言未試人皆惜。一士難招國可羞。豈必後來俱齷齪。若為諸老獨風

流。黃塵袞袞將羊待。往事悠悠與酒謀。聽兒讀衛詩 羔羊同時縫素

絲。抑抑有老尊其儀。如何多善臣子國。猶有北門懷任詩。人生仕進亦偶

爾。出門入室同一軌。書聲聽處千年心。霜月殘缸夜如水。吳禮部集五言

絕句 客有談獻玉絕絃事。因賦二詩 荆璞寧非遇卞和。猶識真識真不

自保。翻恨世無人。識趣全琴在。賞音千載期。朱弦何用絕。自貴不求知。

題謝堯章君琬兄弟詩卷 謝氏家聲舊。今猶好弟兄。依依對床語。惻

惻在原情。露萼花雖減。春池草自生。殷勤同姓老。望爾早來京。題李天

大永

大永



台戴氏詩後 大監能全節。傳家在一經。寧為重席講。不作鼓琴伶。霞映層城赤。春留故樹青。聞孫偶相識。三嘆想儀刑。戴希尹者。為軍器大監內

附。後或薦之不起。有子為教官。與從子同徵亦辭。從子仕至集賢直學士。

讀陳後山詩有感。我名異世偶然同。身迹沉微轉更窮。寄食尚伶從

郭槩。賞音未易見蘇公。病假自秋徂冬。因讀詩及楚辭。後語集成雅言。

秋風草木黃落。日夕羊牛下來。征夫心亦憂止。曷月予還歸哉。昔往楊

柳依依。行邁黍稷離離。懷歸畏此譴怒。靜思不能奮飛。結幽蘭而延佇。攀

桂枝兮淹留。望美人兮未來。思公子兮離憂。日宵宵兮下山。風飄飄而吹

衣。臨清流而長嘆。望青山兮不歸。歲忽忽而道盡。老冉冉其將至。心鬱鬱

之憂思。夜耿耿而不寐。鴈離離而南游。猿啾啾兮夜鳴。天慘慘其無色。荒

亭亭而復明。吳舜舉吾吾類藁擬古 羲畫闡人文。立德繼玄旨。斯道古

攸敦。卒乃滋末技。詞華鄙瑀珎。何況靡工緻。既貽俗眼唾。遂為知音棄。魚

目殆非珎。燕石渾瑤珎。綺麗炫頽波。澹泊啓高致。焉知大雅音。詮諷含六

義。神龍蟄重淵。豈偶介與鱗。變化入冥漠。倏忽致屈伸。歲深苟無欲。此

性安可馴。清晨滌塵慮。拂拭龍唇琴。冰絲映玉軫。宮徵發徽音。一鼓別鶴

起。再鼓紫鳳吟。自非山水工。曷契鍾子心。貞士失知己。何自免陸沉。嘉遇

大永

大永

良難必。聊且慰冲衿。褰衣涉湘渚。崇蘭泛幽香。折以遺所思。柰此道路長。采芳湏及時。過時萎且黃。不念桃李年。離別隔兩鄉。何當早還歸。慰此飢渴腸。寶氣吐光芒。夜燭霄漢上。孰云久淪晦。精米動星象。由來至神物。變化非可狀。離合迹靡同。顯隱何由仗。冥思掘獄初。博識啓浮獎。先正邈云邁。名流若晨星。餘光安足仰。竟莫資典刑。羲農殆黃虞。去余幾千齡。溥源就湮塞。徒茲守群經。苟非述作功。群寐何由醒。炳炳垂懿則。頗惻昧與冥。四壁但蕭然。蓬蒿蔽幽居。豈復計貧餒。志在古人書。我來慕高誼。仰止將焉如。清風百代上。遺言良起予。在昔炎運熄。餘燠起良圖。君臣及際遇。魚水相與俱。乃知長嘯時。興懷佐廟謨。賢輔著伊呂。茲士顧不殊。秉耒南陽者。孰識爲鳳雛。出師戒兩立。懇懇忘勤劬。功名照前代。千載擅八區。擬古禱詩。抱美不自獻。孰識爨下才。乃知荆山珎。終以石見猜。鳳雛未高舉。秉耒南陽隈。何以答三顧。赴敵山亦摧。八陣布雄略。出師真壯哉。溥澆無異源。靡靡逐時變。柰何遷末運。公庶伺其便。長揖采芝叟。不作市城戀。竹與木石俱。何意謀自見。邊隅尚傳警。風塵暗寓縣。前脩邁高節。豈爲來者勸。食薇可終身。深期秬龍戰。哀哀我征夫。遠役在邊戍。雨雪忽載塗。淒其歲年莫。從戎始雖壯。容髮已非故。甘心許徇國。勛業苦

永  
大



難樹枕戈憤已盈。孤征尚誰訴。比日折中路。眷戀情所私。浩浩燕與越。驅車欲焉之。別近恒惻惻。別遠寧不思。寄語室中人。遠游非所陳。昔聞詩與禮。憶在過庭趨。耳熟嚴訓及。媿我昧反隅。中道逢蕩析。念此氣不蘇。深惟素履願。竊比逢掖符。咄嗟歲月駛。莫遂砭厥愚。窮生貴殉義。時流重進諛。猶怜虎口脫。敢冀蝸塗濡。屢空中豈作。寧爲末俗驅。魯連蹈東海。却秦迺權宜。戰國固多士。卓然一見之。余本寒鄉民。族居河之湄。尚友薦嗜古。深秉切自私。一獲展良悟。如掬渴與飢。遐躅邈千載。遺矩誠足追。因之激忠憤。媿乏熊虎姿。濫吹誠竊祿。哂此齊庭筭。定從纔一言。忝與碌碌俱。古稱賢達人。高誼耿不誣。魚目固非珎。竊混明月珠。貴耳恒賤目。把玩復自娛。窮達有恒理。敢昧待賈沽。兵塵昧遐矚。歲深復潛需。荏苒春又夏。芳序不我延。所思邈山海。迢遞隔遠天。寄書雲中鴈。曠絕貽厥讐。榮耀有衰歇。寸心終莫遷。如何結髮親。負此桃李年。朱唇揚妙音。豈計終取憐。當年紉扇謹。安得今尚然。嫵婉懷哀傷。願比金石堅。蹢躅下閨闈。何由已悄悄。高牖照初日。水木湧清輝。拂拭朱絲弦。山水調更微。鍾子不我遇。自與聾俗違。無弦寄高興。此意良未非。折腰早已辱。豈是昧事機。駭奔計已得。邁迹非可幾。古道就蕪穢。末流滋誑譎。邈求竟何稽。誰作復誰

永  
大

輟知愚雖兩致。寧與較縣絕。汗隆逐時變。譬彼涼與熱。朔風吹大漠。夜作千里雪。陰晴苦難恃。舒慘一何別。默悟元化工。喧啾息詳說。惟昔事遠游。發軔自茲始。辛勤三十載。倏忽一瞬耳。未明轍環蹤。竊寃懷居旨。祚運厄陽九。歷稔未云已。鄭重携挈心。千祿爲親喜。出身忝逢掖。殘燬諒非美。多艱亦屢遭。破陷輒中止。自省幾寡譽。所幸免譽毀。遠別同氣親。昕夕竟何恃。於焉限陽朔。曠闊非所擬。相思只長慟。一坐致頻起。寒門嬰變故。延禍及先妣。腸裂五內傷。憔悴復何似。永抱終天痛。不得返鄉里。蕙帷擁虛位。徒見字盈紙。旅魂不可招。痛絕真欲死。忍聞屬續言。離亂念諸子。層雲起遙空。陽曦黯淪沒。倏焉光采歇。變化何倉卒。窮居念離索。終朝恒兀兀。杪冬寒氣慄。凜凜傷肌骨。煖律諒可回。推遷任飄忽。襍詩 河宿爛宵分。嚴霜歇芳物。噉噉南飛鴈。聲逐浮雲沒。征夫懷遠役。戈船連暝發。孰遣嚴程緩。柰此苦寒月。大布不禦冬。况值霜斷骨。命微難自保。去去冒馳突。親知慘別離。割痛永相卹。歸來良有期。會見早寧謐。晨起淒風厲。霜氣欲斷肌。喧涼謹代謝。推遷理無違。念我蓬藿居。懸罄心自怡。寢裯食列鼎。違卹凍與飢。富貴何足羨。賤士安坦夷。嚴城喧夜柝。嗚咽嗚羗管。清輝鑒檐隙。桂魄光復滿。秋聲動寥廓。邊鴻起撩亂。榮茂就衰歇。關河音信



斷客寢不遑安。孰遣愁心緩。踈散已成癖。杜門養愚蒙。矯厲非素習。甘  
此退與窮。由來方鑿資。不與圓柄通。孜孜爲利者。祇自取勞躬。廉立啓貪  
懦。將謝夷惠功。餘生苟可畢。何須問汗隆。擬古十首次劉聞廷韻。逆  
節圯崇綱。橫潰肆狂伴。宗主炳麟史。昧此謀寧緩。民彝詎宜泯。四維遽云  
斷。疇能靖群兇。未覺事功罕。豈不念無辜。憂來氣恒短。卓彼一正功。其人  
獨稱管。騎射息芳辰。餘間端可卜。戲玩足娛心。棘門拋蹴鞠。蹴高齊浮  
雲。式駭衆觀目。將軍誇巧捷。接踢最稱速。噫彼暴殄餘。窮欲未云足。恢恢  
忱弗私。惡稔禍胥促。自從喪亂來。東西安所之。山谷弗可居。浮海弗可  
期。餘黎摩子遺。中邊悉如茲。潘維弛臣節。不覓死獨遲。遁辭尚可托。徒勞  
播聲詩。媿爾忝章甫。哀號奚用悲。夷叔卓傑識。時議駭且驚。始也議形  
色。終焉心靡平。登山迹既邁。薇蕨豈可生。去余已千代。昭然無隱情。後賢  
昧厥旨。較若失萬程。何須重此文。脩辭費將迎。子房閔韓亡。捷足騁高  
志。脩名列三傑。式侈運籌事。地橋期屢失。詎謂偶相值。鍾姿良粹美。神降  
會元氣。明哲旣保身。聲名照天地。漢楚茲遼哉。邈矣隔淮泗。飛鴻墮遺音。  
云有帛書字。光黨著高節。明王禮不賓。藏深靡求術。高蹈豈無因。商嶺  
芝可茹。楚澤蘭堪紉。買斧事樵採。茲焉畢晨昏。伊人不守馮。胡爲乃栖筠。

永大

會元

氣明

哲旣

保身

聲名

照天

地漢

楚茲

遼哉

邈矣

隔淮

泗飛

鴻墮

遺音

云有

帛書

字光

黨著

高節

明王

禮不

賓藏

深靡

求術

高蹈

豈無

因商

嶺芝

可茹

楚澤

蘭堪

紉買

斧事

樵採

茲焉

畢晨

昏伊

人不

守馮

胡爲

乃栖

筠

俯仰終媿作。信罹遭與逆。負固擾南紀。從昔著苗民。虞廷一振旅。舞干

義常陳。祗緣類莫殄。因此弗順身。彌聚仍續武。徒勞邏與巡。網維遽云斷。

那能一朝伸。玄端襲儒服。亦復岸此巾。徒守子雲學。謾誇首陽仁。投畀息

群憤。母令浼斯人。世無柳下惠。疇寬此夫薄。全生已虧行。奚用咨流落。

摘詞縱工麗。未足俾述作。邊廷馳羽檄。擾擾夜喧柝。流血川谷殷。瘡痍曷

清廓。忠臣炳休光。鼠輩尚安托。經德貴不回。吾否悔寧晚。老去莫知非。瞑

行亦亡返。堂堂尋陽守。重義知所本。捐軀著忠節。欲救天步蹇。脩名光簡

冊。不媿巡與遠。爾獨戀鄉井。歸心入私付。安成不可即。何計遂畊壑。謾

補登山屐。徒懷浮海舟。孰抱樂毅才。誰卧元龍樓。往事成悒悒。來今悵悠

悠。戈舸襍游卒。川塗不可游。疇能念塗炭。積此已十秋。人命亦可憐。歛入

水上漚。皇風被九宇。謳吟良不休。絕句 飛來雙粉蝶。還為落紅迷。不

惜餘香在。隨風過檻西。幽居偏寥寞。樹午綠陰圍。更有雙飛燕。新巢次

第完。閉門花落盡。稍稍覺春歸。只憶山中好。雲深筍蕨肥。緘情聊寄

遠。一望去程賒。杳杳飛孤鷺。微茫近落霞。樹色偏宜晚。涵煙接古城。傷

心遙。駐目荆杞亂。來生。昔時詞舞地。處處長蒿萊。共說茅檐底。今朝有

燕來。楚山不可極。楚水欲千重。雨逐飛雲度。相從認去蹤。長飈中夕

永樂

大



起空閨幽思多。忽聞啼杜宇。柰此單居何。飛花隨雨急。欹樹向風斜。不識春歸路。愁來倍憶家。恠得春多雨。農家未力畊。雲濤生近渚。駕得海

舟輕。謾成官柳搖青淺。學眉舞腰纖瘦似蠻兒。多情只解牽離思。剪

盡煙中數尺絲。**楊叔能小亨集**李太白詩長庚昔入夢。名與少陵齊。陳

隋諸作者。稍覺氣焰低。軒昂傲權貴。反爲嬖幸擠。璘也一青蠅。安能點白

圭。採芝謝家英。白骨埋黃泥。效孟東野。聞昔有廉士。井飲投青錢。嗟

余七尺身。眠食須人憐。夜歸借卧榻。朝起尋炊煙。喟然長太息。俯仰羞前

賢。曲肱一榻上。夢與汗漫期。或登高山顛。或步清溪湄。形開日已具。身世

交相悲。願言長不寤。夢裏心怡怡。我願如蚯蚓。食土能充腸。我願如鷦鷯。

自然羽而翔。人生豈不貴。歲暮天雨霜。不知冬日短。但覺冬宵長。緼袍不

息恥。恐污君衣裳。糲食不自難。恐辱君膏粱。青蠅點白石。白璧亦無光。一

人向隅泣。一室皆感傷。**讀徐漢臣詠雪詩**穎守多賓客。玄冬燕賞時。

聚星成故事。刻梓播妍辭。吾子追遐躅。儒官下絳帷。高吟三十韻。擬學二

賢詩。前朝閥閱有光輝。南國衣冠欲奮飛。兩地因緣春夢斷。百年事業

壯心違。四民失職士爲最。數口無依誰與

歸。鬢髮蒼浪五十一。天教去采故山薇。

永  
大

永樂大典卷之九百二

永樂大典

永樂大典





